

Mepepelime mo Ufaru ma Bulu a tyo ya Aza a Korinti

Ucuɗuwu wa aatagada a nda

Bulu ɗana ta mepepelime ma nda na mepepe-
lime mo ro a tyo aza e Itoni o ro atsuma a Korinti.
Korinti abajini a lyuci a da zuzu na nge'en m mala.
Ama bata bata a dana ta de na nden. Lyuci'i u dana
ta na ala a vama adama a mayan me iwuya ko ili
yi idaba pe. Iroci yi ili i na a dansa ayi da aa'isa
a amali a Afurodata, ubata u na a zuwai ashakala
ukpakukupa (1,000) adama o ulinga wa aza a na
aa yuwusaan ure we epen aganda. Bulu 'yawa
ta de reve u linga adama u tsura ikebe yi ili i na
waa dana a lyuwusa waru o ritosu ama adama e
Yesu. Aza e Itoni na abunda alambi a da a dana a
mantsa mo ndolo, amma ama o ro gba shi a shi ta
nu ucira.

Atsuma e mepepelime ma nda, Bulu rito ta aza
e Itoni cine a yuwan nden n le ubata u na ama
a abunda a ri a yuwusan ili yi idaba. U damma
ta aza e Itoni a yuwan nden ma ankuri na akapi
a ama a na a buwai, she a dana wukasu wan. U
rito ta ama she a yuwan tsipere wan ko iwuya i
ro wan. U cuɗuwa ta cine wu ntsayi lolo dana. E
mepepelime ma nda Bulu damma ta cine icigi i
ri nu ucira lon. U roco ta cine waru wu ntsayi a
yuwan aganda. O ukosu, u cuɗuwa ta ulyuwu wa
aci e Yesu na a 'yasaɗin diga o ukwa, ne da fo aza e
Itoni a yi suru aa dana nu ulyuwu wa aci.

Ulyuwu wa aci e ekere o ukwā u tawāa tā nu ucira e ekere aza e Itoni. Icigi yi ili yu uvadi abajini e ili i wuya i da. Aatagada a nda a damma tsu tā ulyuwu wa aci e Yesu Zamawawa e ekere o ukwā a la'a tā icigi yi ili yu uvadi, ne da za vi Itoni a gura suma ili yu uvadi reve u kuru Zamawawa ulobonu.

Ili i na i ri pe atsuma a aatagada a nda

1. Icasu na avasa a Bulu (1:1-9)
2. Ipati adama o ubolu wa aci (1:10-4:21)
3. Addama atsuma a tsu'utsa (5:1-7:40)
4. Tsutoni na Asula o una wa amali (8:1-11:1)
5. Uritosu cine a yuwan aganda na wuma wa aa'isa (11:2-14:40)
6. Ulyuwu wa aci a Kristi Zamawawa a aci o ukwā (15:1-58)
7. Sadaka adama a alambi (16:1-4)
8. Ifofi yi mmalu ma Bulu (16:5-12)
9. Majiyan ma Bulu ni icasu ya yi (16:13-24)

Ucuduwu

¹ Amu Bulu da n danaa ndu aa'isa a aza e Itoni atsuma a Korinti mepepeline ma nda. N ta lyungusaa du ni icasu. I'utsa i tsu Satsani fo u ta lyungusaa du ni icasu. Asula e de mu ta amu Bulu, mo o'wo aajiya e Yesu Kristi Zamawawa, adama a na ne da u cigai. ² Asula e de du ta yo o'wo ama a akiza a yi. U kambato du ta na akiza e ekere e Yesu Zamawawa. U yuwaan ta ne fo aza a na a yuwaan niyi aganda atsuma a Zagbain Yesu Zamawawa bata koko'o. Zamawawa da Zagbain tsu na akapi ama fo.

³ Lyawa Asulā Dada tsu obolo nā Zagbain Yesu Zamawawa a ca dū isa'ani na asuvu nden.

Bulu godyoo tā Asulā

⁴ N tsu godyoo tā Asulā kuci adama e ne'e na u ca ndū, gogo a na yo o'woi aza e Yesu Zamawawa. ⁵ E re suru yo o'wo tā aza o utsuru, atsuma a adanshi nu urevu suru adama a na yo o'wo tā ili i tā nā ayi. ⁶ Ayi nda u roco tā ili i na n damma ndū adama a yi amayun a da. ⁷ Adama o ndolo, i ushi tā ne'e suru na Ruhu vā Asulā aa casu, adu a pura ukambu wu Zagbain Yesu Zamawawa. ⁸ U tā banā dū nu ucira hali o ukosu adama Asulā o goro dū atsuma e ili i ro o urana u na wā tawisa waru wan. ⁹ Amayun a da Asulā a ta yuwaan dū ne, adama a na u tsu yuwan tā ili i na u dammai, u ɗangwa dū tā yo o'wo ili i tā nā Mawun mā yi, Zagbain tsu Yesu Zamawawa.

Ama e ne'eshen tā re re

¹⁰ Ama a vā, n ta patishi dū, adama o tsugono tsu Zagbain tsu Yesu Zamawawa, na suru ndū i usulai. She yi kasa wan, amma i boluloi aciya^{ɗu} ubatā u tā adama i ɗanā no okolo a tā nā majiyan mā tā. ¹¹ Ama a vā, ama o ro aza a na a ri de nden o u'wa wā Kuluwi* a damma mu tā a na i tā a mawasan vāni dū. ¹² A damma tā vuma suru ta yuwusan adanshi a yi ko'o. Vuma ro damma, “N te itoni yā Bulu.” Za ro a dansa “N te itoni ya Apolo.” Za ro waru a dansa, “N te itoni yā Bituru.” Za ro gba a dansa, “N te itoni yi Zamawawa.”

* **1:11** Kuluwi ka da, waru o utā yi a alanga e eteshe ko ama'a aza a yi a da ko aza a yi a da shi, waru ko agbashi a da ko ama a na a ri pe nā nden atsuma o u'wa wā yi u da shi.

13 A ta gura ne'eshen Zamawawa za na ri vuma ta koko'o? O'o! Bulu kuwa ta adama a du a akpata? † O'o! A rumbu du ta tsara yoo o'wo otoni a Bulu? O'o! 14 N godyo ta Asula a na n rumbuyi ko vuma ta atsuma a du shi, she Kirisibu na Gayu. 15 Gogo babu vuma na aa damma a rumbu yi ta atsuma a ala a va. 16 (Kai, n cuwan ta gogo! N rumbu ta Istifana na ka va yi na muwun ma yi, waru maa gura cuwan ko n rumbu ta nanza shi.) 17 Zamawawa† lyungu mu n rumbu ama shi. U lyungu mu ta n yuwan alajiya a Alabari a Sa'ani. Na n damma Alabari a Sa'ani'i, she n yuwan nu ugbozu wa ama wan, adama a na n ciga ucira wu ukwa wu Zamawawa zuva va akpata wo o'wo pere shi.

Zamawawa da ucira nu ugbozu wa Asula

18 Na ama a na a ri o ure wu ukwa a uwwa ikaka adama o ukwa wu Zamawawa, u tso o'wo le ta gashi tsulo. Na atsu na Asula a wawusa tsu uwwa yi, ucira wa Asula u da. 19 A dana ta atsuma a Adanshi a Asula:
 “N ta lungusa ugbozu wa aza a na a tarai aciyele a ta nu ugbozu.

N te geshe urevu wa aza o urevu.”◇

20 Nye i da i ri ulobonu atsuma o uvaɗi wa aza o urevu wa adanshi, na munlu n wila, na aza a ndammulai? Asula a zuwa le ta suru o o'wo olo waru u roco ta ugbozu u le u ri na abula shi. 21 Asula za na ri nu ugbozu o fofo ta ama o uvaɗi u nda aa tsura yi shi, no o toni ugbozu u le. O una u ndolo, u dangwa ta u wawa aza a na a ushiyi

◇ 1:19 Isha. 29:14.

ikaka i na tsu yuwain alajiya, ikaka i na yo o'woi gashi tsulo. ²² Aza a Isra'ila a ciga ta ee ene ili ya asalama tsara u roco a na Asula a ri o ulinga. Atakpaci a ciga ta a tsura ugbozu. ²³ Adama o ndolo, ana tsu yuwain alajiya a na Zamawawa kuwa ta a akpata,† aza a Isra'ila a tara yi ta gashi unusu, avu Atakpaci a damma ili i tsulo tsa da. ²⁴ Amma ikaka'a a tyo e ekere a aza a na Asula a dangwai, aza a Isra'ila obolo na Atakpaci, ayi da nda: Zamawawa, ayi da ucira wa Asula waru ayi da ugbozu wa Asula. ²⁵ Ko na Asula a yuwan gashi u tu ulo, u la'a ta vadilima ugbozu, ko na wo o'wo gashi babu ucira, u la'a ta vadilima ucira.

²⁶ Ama a va, cuwain cine i danai ana Asula a dangwa ndu. Ama o uvadi u nda a jiyangashi wa'a da atuma a du a ri nu ugbozu. Ama wa'a da a danai azagbain a lyuci atuma a du. Waru wa'a da utai atuma a du o u'wa u tsugono. ²⁷ Amma, Asula a dangwa ta ili i na ama a tarai tsulo tsa da tsara u zuwa aza a na a tarai aciyele aza o ugbozu a uwwa wono. Waru u dangwa ta aza a na a ri nu ucira shi, tsara u ca aza o ucira wono. ²⁸ U dangwa ta ili i na ama o uvadi a tarai ili shi, ko babu abula, ko babu ili i ro ko ke'en, avu u linga ne ele adama ili i na ama a tarai ili ya abula yo o'wo babu abula. ²⁹ U yuwan ta ne tsara vuma ro yuwan uvadu a makakan ma yi wan. ³⁰ Asula a da za na zuwa ndu yo o'wo ubolu na Yesu Zamawawa. U kambato ta Zamawawa na aciyayi wo o'wo ugbozu adama a tsu. Adama a yi a da Asula a usu ntsu. U kambato tsu ta aza a akiza, waru u ca ta aciyayi tsara wu utaa tsu ubata wu unusu. ³¹ Adanshi a Asula a damma ta, "Vuma na cigai yuwan uvadu, u yuwan

goon ățsumă e ili i na Zagbain yuwain.”

2

Adanshi adama a Zamawawa nu ukwā wā yi

¹ Ama a vā, ana n tawā n damma ndu ikaka ya Asulā, n yuwaan ɗu adanshi nu uguru wa adanshi ko n roco n tā nu ugbozu shi. ² Adama a na a mantsa ma na n ɗanai oḅolo nā ɗu, n zuwa tā aciyavā mi icina ili i na i buwai suru, she Yesu Zamawawa goon nu ukwā wā yi a akpata.† ³ Ana n tawai ubata u ɗu, lipu vā ɗana nu ucira shi, waru n ɗana tā e meje'en adama o wovon. ⁴ Waru ana n ɗanai o uritosu na alajiya n yuwan tā adanshi hawun. N yuwan ugbozu ko adanshi o morono mo ugbozu shi. N lyawa tā Ruhu vā Asulā roco ucira wā yi. ⁵ N yuwan tā ne tsara i ca okolo adama o ucira wā Asulā, agba adama o ugbozu wu vadilima shi.

Ugbozu wā Asulā

⁶ Nā n ri oḅolo na aza a na a gbamai ɗe ățsumā e Itoni, n tsu yuwan tā adanshi nu ugbozu. Amma cu'un vu ugbozu vu uvadi u ɗa shi, waru cu'un vu ugbozu na azagbain o uvadi a cigai ɗa shi. Ele ɗa aza a na ucira u le woo o'wo babu aḅulā. ⁷ Amma n ta yuwusan adanshi o usokowu wu ugbozu wā Asulā, za na u lyawai usokowu hali a tyo gogo. Kafu u yuwan uvadi, Asulā o foḅo tā ugbozu u nda tsara u tawaa tsu nā tsugbain. ⁸ ățsumā a azagbain o uvadi a nda babu za na tsurai urevu u ndolo. Nā a shi e reve, a shi a vara Zagbain na ri nā tsugbain a akpata shi. ⁹ Amma Adanshi a Asulā a damma tā:

“Ili i na Asulā o foboyi aza a na a ciga niyi u la'a t̄a ili i na ee eneshe ne esu e le, waru u la'a t̄a ili i na a uwwai na atsuvu e le. Koto nanza jiyān ili i ndolo o okolo ā yi shi!”

¹⁰ Amma tsu reve t̄a ili i ndolo suru adama a na Ruhu v̄a Asulā roco ntsu d̄e ili'i suru. U reve t̄a ili suru, hali ni ili yu usokowu i na i ri a majiyan m̄a Asulā. ¹¹ Avu d̄a goon vu revei ili i na i ri pe ātsumā o okolo ā wu, waru Ruhu v̄a Asulā d̄a goon revei ili i na i ri pe ātsumā o okolo ā Asulā. ¹² Amma Asulā a ca tsu t̄a Ruhu v̄a yi. Ayi d̄a i zuwai tsu ri n̄a majiyan m̄a t̄a n̄a aza o uvadi a nda shi. Ayi d̄a i zuwai waru tsu revei fo ili i na Asulā a ca ntsu faan. ¹³ Ana tsu damma n̄du ili i ndolo, tsu yuwan ulinga ni idanshi yu ugbozu wu vadilima shi. Tsu yuwan t̄a adanshi a na Ruhu damma ntsu tsu damma ana tsu cuduwai amayun a nda ā tyo aza a na ā ri n̄a Ruhu. ¹⁴ Ayi d̄a i zuwai she vuma na ri n̄a Ruhu v̄a Asulā goon d̄a aa gura reve aba'un a Ruhu. Vuma na ri n̄a Ruhu v̄a Asulā shi, u tsu jiyān t̄a gashi aba'u'un tsulo tsa d̄a. ¹⁵ Vuma na ri n̄a Ruhu suru u ta gura petelyuwe ili i nda, amma babu vuma na aa gura petelyuwe vuma'a.

¹⁶ Adanshi ā Asulā a damma t̄a:
 “Zane d̄a gura revei majiyan m̄a Asulazuva?
 Zane d̄a aa gura ca yi āsala?” ◇

Amma tsu gura t̄a reve ili i nda, adama a na tsu t̄a no okolo a Zamawawa.

3

Agbashi ā Asulā

¹ Ama a va, ana n danai obolo na adu n yuwaan du adanshi cine maa yuwaan aza a na a gbamai de atsuma e Itoni shi. N yuwaan du ta adanshi gashi adu aza a na a ri pe atsuma o uvadi da ko gashi adu nrebu n da atsuma a Zamawawa. ² N lyuwato du tsuwa shi, adama a na i buwai a apasa maani. Ko gogo koto i rawa i lyuwa tsuwa shi, adama a na hali n gogo i buwa ta a yuwusan nden n du gashi aza a na a ri pe atsuma o uvadi. ³ I ta tsushu'un vani du waru i ta mawasan vani du. Ayi ili i nda i roco ta a na i buwai atsuma o uvadi, waru i buwa ta o tonore va yi. ⁴ Za ro a dansa, "N te itoni ya Bulu." Za ro waru a dansa, "N te itoni ya Apolo." Ana yaa dansa cu'un ndolo, i rotso ta ama o uvadi.

⁵ To, Apolo gba ili i ro i da? O'o! Bulu waru gba ili i ro i da? O'o! Atsu agbashi a Asula a da goon, aza a na aa kambusa du i usu. Za suru atsuma a tsu u ta yuwusan ulinga u na Zagbain ca niyi u yuwan. ⁶ Amu n cu'wan ta avu Apolo tsun mini. Agba Asula a da a tsu zuwa yi u kungwa. ⁷ Za vu ca'an na za vu utsusun u mini ili i ro i da a ri shi, amma Asula ili i ro i da adama a na ayi da u tsu zuwa icu'u'un i kungwa. ⁸ Za vu ca'an na za vu utsusun u mini a ciga ta icu'u'un a kungwa tsara uduma u lobono. Asula a ta ca vuma suru iliyinkapa atyo o ulinga u na u yuwain. ⁹ Adama a na atsu n'utsa mu ulinga n na tsa yuwusaan Asula ulinga da, waru adu uduma wa Asula u da.

Waru adu usaa wa Asula u da. ¹⁰ N yuwan ta ulinga wu suwi va amayun, adama a na Asula a kamba mu ta n yuwan yi, waru n vara ta ikyun yu usaa, avu vuma ro reme usaa zuva va yi. Suru ndu i yuwan ugbozu cine yaa yuwusan

usaa'a. ¹¹ Ikyun yu usaa u na tsu varai de, Yesu Zamawawa† da, waru babu vuma ro na aa varisa ikyun i ro. ¹² Vuma na a yuwan usaa e ikyun yu usaa i ndolo, za ro ta yuwan ulinga na zinariya, ko azurufa, ko atali e ikebe, za ro gba shi danga, za ro waru alawan, ko tsu'iwa. ¹³ Amma urana wu uge'etosu u ta lo a tawa a na aa lyungwa tsara e ene cu'un vu ulinga na suwi suru yuwain. A ta zuwa ulinga u vuma suru atsuma a akina tsara e ene ko u ta kula. ¹⁴ Nu usaa'a u kula atsuma a akina'a shi, to, suwi ndolo ta tsura iliyinkapa. ¹⁵ Amma nu usaa'a u kula, ayi suwi ndolo ta lamba ili suru. Ayi suwi'i u ta la'a, amma u to o'wo gashi vuma na utulai atsuma a akina.

¹⁶ N reve ta a na i revei a na adu aa'isa a Asula a da waru Ruhu va Asula ta pe nden atsuma a du! ¹⁷ Asula a ta lungusa vuma na lungusai aa'isa a Asula. Ili i na i zuwai ayi da aa'isa a Asula a ta na akiza, waru adu aciyadu adu dada aa'isa'a.

¹⁸ Lyawai a pususan aciyadu ana. Na yaa yuwusan majiyan i ta nu ugbozu atsuma o uvadi u nda, to, i kambato aciyadu olo adama a na ne da yoo o'wo aza o ugbozu wa amayun. ¹⁹ Ili i na uvadi u tarai wo o'woi tsulo, ayi da ili i na Asula a tarai ugbozu. Adanshi a Asula a damma ta, "Asula a tsa azu ta aza o ugbozu a mantsa ma na aa yuwusan ugbozu u le." ²⁰ Waru u dammisa ta, "Asulazuva e reve ta a na ifobi i na aza o ugbozu a yuwain suru pere da." ²¹ Adama o ndolo she i 'yasan avangaci adama a na yoo tono vuma gbain ro wan. Ili suru aza a du a da: ²² Bulu, na Apolo, na Bituru aza a du a da. Waru uvadi magula za du da. Wuma, nu ukwa za du da. Ne da mantsa mo gogo na mantsa ma na

maa tawa. Ili suru e ekere a du a da a ri, ²³ waru adu e ekere a Zamawawa da i ri, waru Zamawawa e ekere a Asula a da u ri.

4

Ulinga wa ajiya

¹ Lyawa ama a tara tsu agbashi a Zamawawa, aza a na Asula a cayi ili ya amayun i na i ri usokowu. ² Na ama a ca agbashi ulinga, a ciga le ta a yuwan ulinga'a cine wuntsayi a yuwan. ³ Amu u balā mu ko i ge'eto mu ko ukobu wu uge'etosu wa ama u ge'eto mu shi. N tsu ge'eto aciyawa shi. ⁴ N reve ta asuvu a va a ta cece. Amma suru na ne u kambato mu cece shi, adama a na Zagbain da za na ee ge'eto mu. ⁵ She i ge'eto kafu mantasa ma rawa wan, i puro hali Zagbain kamba. U to utaa ili i na i ri usokowu atsuma e irumbu e ekan, waru u ta palu'wa ili i na ama a cigai i na i ri usokowu o okolo e le. Asula a da aa cibala vuma na acibalu a na a ntsaa niyi.

⁶ Ama a va, amu na Apolo iroci i da atsuma e ili i na maa yuwusan adanshi a aci a yi, tsara i tsura urevu wi ili i na udammu'u u ri, "Toniya ili i na a danai atsuma a Adanshi a Asula goon." Tsundolo yaa 'yasan avangaci reve i tara manlu ma du ma la'a ta manlu mo ro shi. ⁷ Zane da vaa tarasa aciyawu? Vu ta tarasa vu la'a ta akapi a aza e Itoni? Nye da vu ri na ayi na Asula a da a ca nuwu ayi shi? Nni ili i na vu ri ne ele suru ubata wa Asula a da o utai, cine vaa 'yasan avangaci gashi avu da vu yuwan nle na aciyawu?

⁸ I ta yuwusan majiyan gashi i tsura ta de ili i na i cigai suru. I yuwan ta majiyan gashi i ta nu

utsuru. I ta yuwusan majiyan yo o'wo t̄a ngono goon d̄u reve i lyawa tsu. N ta ciga yo o'wo ngono na amayun adama tsu yuwain tsugono obolo. ⁹ Me ene t̄a gashi Āsulā a zuwa tsu ātsu ajiya† ā yi tso o'wo ama a na ama a tarai ili i ro shi, cine aza a na ā ri o u'wa wa ali ā ri ācaṗa suru suru. Tsu t̄a tsa ama a na a tarai ā tyo a agalaci reve o una le,* adama ama suru n̄a nlingata mā Āsulā e ene cine āa kuwā. ¹⁰ Ama o uvadī a nda ā te inda tsu gashi olo adama a na tsa a yuwusan ulinga wu Zamawawa. Amma ād̄u, i ta dansa i t̄a nu ugbozu lon, adama a na i ri e itoni yi Zamawawa. Agba ne d̄a shi. I ta yuwusan majiyan tsu ri nu ucira shi ād̄u gba i t̄a nu ucira. I ta yuwusan majiyan ama a ta casu d̄u tsugbain, agba a ca tsu tsugbain shi. Agba ne d̄a shi. ¹¹ Hali n gogo tsu lamba t̄a ilyalya n̄a mini mo oso. Akashi a d̄a tsu ri ne ele goon na tsoo oto. Ama o to ɓongishi tsu lon. Tsu ri nu u'wa wa aciyats̄u shi. ¹² Tsu yuwan t̄a ātyo a na tsa a yuwan ulinga ne ekere ā tsu. Na ama a yuwaan tsu unā, ātsu tsu zuwaa le t̄a aba'un. Na ama o ɓongi tsu, ātsu tsu kaɓa t̄a pe asuvu. ¹³ Na ama a yuwan adanshi a vanvama adama ā tsu, ātsu tsu damma t̄a ili i sa'ani a aci e le. Hali n gogo ama a ta tarasa tsu tse everi waru gashi akkama.

¹⁴ Maa d̄anasaa d̄u ili i nda adama yu uwwa wono shi. N ciga t̄a n rono d̄u atsuvu adama a

* **4:9** N̄a yali ya Roma i lyuwa uvon reve u kamba ā wata, u t̄a d̄ana elime, āvu āsoja na ama a na a kamba niyi ā kuru ācaṗa, aza a na ā d̄ana ācaṗa suru suru ele d̄a n'yuwatan n na e remei baṗa o uvon reve a zuwa le o u'wa wa ali. Bulu ta kuratosu aciyayi na aza a na e remei na aa zuwa o u'wa wa ali aza na ā ri ācaṗa suru suru.

na muwun n va n da i ri. ¹⁵ Ama ukpakukupa kupa (10,000) ta gura rito du adama a Zamawawa, amma amu da a nde'en dada du goon. Yo o'wo ta muwun n va ana n damma ndu adama e Yesu Zamawawa. ¹⁶ Adama o ndolo m pati du ta i toni iroci i va avu i yuwan cine maa yuwusan. ¹⁷ Ayi da i zuwai maa lyunguwisa du ulobo u va Timoti atsuma e itoni. Ayi macigata ma va ma da waru aagbashi a abula a Zagbain a da. U ta cuwaan du ni ili i na n ritoi adama e Yesu Zamawawa atsuma a a'isa a aza e Itoni ubata u na n 'yawai suru.

¹⁸ Ozo o ro a du a ta 'yasan avangaci adama a na i yuwain majiyan ma na maa tawa n kalyuwa du shi. ¹⁹ Amma na Zagbain lyawa mu n tawa, maa jima shi n ta tawa. Na n tawa n te ene ili i na aza a na aa 'yasan avangaci aa yuwusan. N te reve ko ubata wa Asula u da a tsurai ucira u le, ko adanshi a da aa yuwusan goon. ²⁰ Adama a na tsugono tsa Asula adanshi a da a yuwusan goon shi, amma adama o ucira. ²¹ Atsuma e ili i re i nda, zane da i dangwai: n tawa du na aasudu ko n tawa du ben ni icigi?

5

Tsipere atsuma a aza e Itoni

¹ Mu uwwa ta ama a dansa za ro atsuma a du ta yuwusan tsipere, a na u ta yuwusan tsipere na ka va dada va yi. Ko atsuma a aza a na e revei Asula shi a 'yuwan ta cu'un vu unusu u ndolo. ² U rawa ta yu uwwa wono, agba adu da nda a 'yasan avangaci. I yuwan atsumolangu adama o unusu u vuma'a. Ni i shi i yuwan atsumolangu tsundolo, i shi ta putsaa vuma ndolo a yuwan ibolo na adu.

³ Ko na wo o'woi n ta alanga na adu, n tsu yuwusan ta majiyan adama a du. N yuwan ta uge'etosu gashi n ta lo obolo na adu gogo. Nu ucira u na Yesu Zagbain ca numu, n damma ta a na i ciga i 'yuwan i ca vuma na aa yuwusan unusu u ndolo oforo. ⁴ I de ibolo waru ucira wa Yesu Zagbain ta dana obolo na adu atsuma e ibolo i ndolo. ⁵ I 'yuwan i ciga i ca vuma ndolo a tyo o ucira u Male, tsara u lungusa lipu vuma ndolo, amma a ta wawa ruhu va yi na Yesu Zagbain tawa.

⁶ Uvadu u du u ri ulobonu shi. I reve ta udammu u nda, "Ununa wolilo† wa'a u tsu zuwa yira ya akala atsuma e meretsu i tsutsa tapu." Ili i nda u to rocosu ni i lyawa vuma ndolo na aa yuwusan tsipere tso ndolo lyuwa elime na adu, ama o ro atsuma a du a ta gura reme mayan ne. ⁷ Cine aza a Isra'ila a tsu tawa wolilo suru a 'wa le kafu a yuwan Abuki a Mapasa, ne da yaa yuwan, yu utaa vuma nda atsuma a du. Asula a kambato du ta cece adama a na Zamawawa kuwai tsara u kambato tsu faan e ekere o unusu. Wo o'wo ta tsa magiri'i ma na aza a Isra'ila o unai de a Abuki a Mapasa nu ujimu lon. ⁸ Adama a na ne da u ri na amayun, tsu danai a cuwusan kuci a na atsu ama a Asula a da. Tso ocoyi akuci o wolilo, ele da tsurala, na tsushu'un, na re vi iwuya i na tsu yuwain kafu tso o'wo aza e Itoni, amma tsu yuwain amayun na abula tsa akala tsa na a yuwain na wolilo shi.

⁹ Ana n danaa ndu nu ufaru, n damma du ta she i bolo aci na ama a na aa yuwusan tsipere wan. ¹⁰ N ta yuwusan adanshi adama a aza e Itoni a na a yuwusan tsipere, agba a aci a aza a na a ri aza e Itoni shi. Amayun a da ozo o ro e le a yuwan ta de

tsipere. Ozo o ro e le a ta nu utsan, ozo o ro waru aza a a'usa, ozo o ro waru a ta yuwusaan amali aganda. Ni i ciga yi kasa na cu'un va ama o ndolo, to i lyawa uvadi. ¹¹ Ili i na maa dansaa du ayi da yi kasa na za na e desu aciyayi za vi Itoni amma u ta yuwusan tsipere. Yi kasa na ama a na a ri nu utsan ne evu. Waru yi kasa no ososowi na aza a na e isulusa ama na aza a a'usa. Waru yi kasa na ama a na yuwusaan amali aganda. Ko tsuwa she i lyuwa obolo na cu'un va ama o ndolo wan.

¹² N ri nu ucira n ge'eto aza a na a ri aza e Itoni a da shi. Amma i ta nu ucira u na yoo boryo aza a du aza a na a tsu yuwan cu'un vu nusu ndolo. ¹³ Asula a te ge'eto ama a na a ri aza e Itoni shi. Adanshi a Asula a damma ta, "Na atsuma a du za ro pe ni iwuya, i lo yi." ◇

6

Ntaralai a 'yawaw o ukobu wu uge'etosu

¹ Atsuma a du na za ta du ri na mawasan na za ro, she u 'yawaw o ukobu wu za vu uge'etosu na ri za vi Itoni shi wan. U damma ama a Asula e ge'eto adanshi'i. ² Adu i reve urana u ro atsu aza e Itoni tsu ta ge'eto uvadi shi? Na adu da yee ge'eto uvadi, yaa gura ge'eto addama e keke'en a nda shi? ³ I reve ta mantsa ma ta lo a tawa a na tsee ge'eto nlingata ma Asula, adama o ndolo amayun a da tsu ta gura ge'eto ili i na i buwai atsuma o uvadi. ⁴ Ni i ri na cu'un mawasan ndolo, cine tsa da yaa 'yawusa ubata wa aza o uge'etosu a na a ri atsuma a tsu shi, aza a na ama a Asula a tarai ili i ro shi? ⁵ N

ta yuwusan adanshi a nda tsarā yu uwwa wono. N reve tā atsumā a dū aa lamba za vu ugbozu na aa gura ge'eto nā a tsurā mawasan atsumā a aza e Itoni shi. ⁶ Amma o unā u ndolo, reve aza e Itoni e re a 'yawa o ukobu wu uge'etosu, avu a uwa mawasan a makakan ma aza a na e revei Asula shi. She i yuwan tsundolo wan!

⁷ Ni i tara mawasan mā dū a tyo o ukobu wu uge'etosu, to, i riyā tā. Atsumā a dū nā za vi Itoni ro nusaan dū, she i 'yawato yi ubata wu za vu uge'etosu avu yi isula yi wan. U ta la'a i rungwa. Ko nā za vi Itoni ro paala dū, she i 'yawato yi ubata wu za vu uge'etosu avu yi isula yi wan. U ta la'a i lyawa yi ne. ⁸ Amma adu na aciyadu i tsu yuwan tā iwuya reve waru i paala ozo o ro, i tsu yuwan tā ne a tyo e ekere aza a dū aza e Itoni!

⁹⁻¹⁰ She yi lumā aciyadu wan. I reve tā za vi iwuya aa tsurā tsugono tsā Asula shi. Ama a nda ele da aza a na a yuwusaan amali a aganda. Ele fo aza a na a yuwusan tsipere, ama a nda aa tsurā tsugono tsā Asula† shi. Ne da waru ali a na a tsu lyawa ali a yuwan tsipere ne ele e re koko'o. Evu, nā aza o utsan, nā aza a ngalalai aa tsurā tsugono tsā Asula shi, obolo no ososowi, na aza a na a lungususa ala o ozo o ro. Aza a na a yuwain cu'un ndolo aa tsurā tsugono tsā Asula shi. ¹¹ Kafu i usu Zamawawa, ozo o ro a dū a yuwan tā cu'un vi ili yi idaba i ndolo. Amma Asula a zaza'wa tā nusu dū suru avu u kambato dū cece, reve u kambato dū babu unusu a makakan mā yi. U yuwan tā ili i ndolo suru atsumā a ala a Zagbain Yesu Zamawawa waru nu ucira u Ruhu va Akiza.

I ca Asula tsugbain nā lipu dū

12 Apa ili i na ozo o ro a đu a dansa: “N ta gura yuwan ili i na n cigai, adama a na amu za vi Itoni đá.” Apa cine n tsu usu: “Ee, uritosu u ndolo amayun a đá. Agba ili i na maa gura yuwan suru i đá yaa kamba mu shi.” N ta gura damma, “N ta gura yuwan ili i na n cigai biti,” amma n lyawa ili i ro i kambato mu aagbashi a yi shi. 13 I damma ta, “Ilyalya i tu ulobonu adama a aatsuma, waru aatsuma a tu ulobonu adama e ilyalya.” Amayun a đá, amma urana u ro Asula o to kototo le ra. Asula a yuwan lipu adama e tsipere shi. U yuwan yi ta tsara u yuwaan Zagbain aganda, waru Zagbain ta kpatu'waa lipu'u ure u matsura. 14 Asula a 'yašan ta Zagbain atsuma o ukwa, waru ayi fo u ta 'yašan tsu nu ucira wa yi. 15 I reve lipu đu pasu lipu vu Zamawawa đá shi? U tu ulobonu m bolo akapi a lipu vu Zamawawa na aashakala? O'o, ko ke'en! 16 Adanshi a Asula a damma ta, “Ejere'e o bolo ta avu o o'wo ili i ta.” ◇ Adama o ndolo, tsu reve ta na vuma bolo aciyayi na aashakala, wo o'wo ta lipu ta na ayi. 17 Amma vuma na boloi na Zagbain, ruhu va yi na ruhu vu Zagbain o o'wo ta ili i ta.

18 I suma mayan me tsipere. Ko cu'un vu unusu u ne u đá vuma yuwain a alanga a lipu a đá u ri, she tsipere. Aza a na a yuwusan tsipere a ta nususaan lipu le. 19 Adu i reve a na lipu đu u'wa wa Asula u đá ubata u na Ruhu va Akiza ri nden shi? U ta pe atsuma a đu. Asula na aciyayi a đá a ca ndu Ruhu va Akiza'a. Adu aza a aciyadu a đá i ri shi, amma aza a Asula. 20 Asula a tsula đu ta. U tsupaa đu ta na abunda lon. Adama o ndolo, ili i na yaa zuwa lipu

◇ 6:16 Ufr. 2:24.

ɗu yuwan suru u roco na yaa casu Asula tsugbain.

7

Uritosu adama o lolo

¹ To, gogo n ta damma ɗu majiyan ma va adama e ili i na i danaa numu. I ta dansa, “Na vuma ciga zuwa Asula a uwwa uyo'o, u ta dana ulobonu u kuda e reve ka ko ke'en.” ² Apa u'usus u va: Ama na abunda aa gura guza aciyele shi, reve a yuwan tsipere. Ayi da i zuwai u ri ulobonu vuma suru zuwa ka va yi avu u danu na ayi goon, waru u tu ulobonu ka suru yuwan lolo avu u danu na vali va yi goon. ³ She vali 'yuwan o von na ka va yi wan. Waru, u ri ulobonu ka 'yuwan o von na vali va yi shi. ⁴ Ka'a gba u ri nu ucira adama a lipu va yi shi, she vali va yi, ne da waru vali ri nu ucira u lipu va yi shi, she ka'a. ⁵ She i 'yuwunlai a ca aciyaɗu lipu wan, she ni i usulai a mantsa wa'a tsara i ca mantsa ma avasa. Reve i tawulai waru tsara Malef ma lyungwa du u na yaa gura guza aciyaɗu wan. ⁶ N damma ta ne tsara n ca du ure adama yi kasa na nven ne'en hali mamantsa. Wila u da shi. ⁷ N shi ta ciga aza e Itoni suru a dana babu lolo, cine amu n ri babu lolo. Amma vuma suru Asula a tsu ca yi ta une'e wa yi. Vuma ro nu une'e u nda, za ro waru nu une'e u ndede.

⁸ Gogo n ta dansaa ali na amaci a aza e Itoni aza a na ali ko amaci e le a kuwai de. U ta la'a ulobonu a dashi yuwan lolo waru wan. I dana ne babu lolo cine amu n ri. ⁹ Amma na yaa gura guza aciyaɗu shi, to, i yuwan lolo. U ta la'a ulobonu i yuwan lolo a na yaa dana a majiyan ma lipu kuci agba yaa yuwan majiyan me ili i ro shi.

¹⁰ N ta na wilā u nda adama a aza a na a ri na lolo. Amma amayun a da a na Yesu Zagbain na aciyayi a da u ca ntsu wilā u nda. Ayi da u zuwaa ndu wilā'a, amu da shi. Avu ka, she vu kakasa lolo va wu wan.

¹¹ Amma na vu lyawa yi, she vu dashi yuwan lolo ro wan, amma vu kamba ubata u vali va wu. Avu vali waru, she vu gbara ka va wu wan.

¹² Gogo n ta yuwusan adanshi na aza a na oloi aza a na a ri aza e Itoni shi. Yesu Zagbain ca tsu wilā adama a nda shi, amma amu n ta ca du uritosu u va. Ozo o ro aza a na a ri aza e Itoni a ta na amaci a na a ri aza e Itoni shi. Nu u ciga u danu na avu, she vu lo yi wan. ¹³ Waru, na avu ka da na vu usuyi Yesu, agba vali va wu za vi Itoni da shi, avu u ciga u danu na avu, she vu kakasa na ayi wan. ¹⁴ Na ka da vu ri atsuma e Itoni, agba vali va wu za vi Itoni da shi, adama a wu lolo du wo o'wo ta na akiza. Waru na vali da vu ri atsuma e Itoni za na ri na ka na ri atsuma e Itoni shi, adama a wu lolo du wo o'wo ta na akiza. Na ne da shi a na muwun n du fo o'wo ta idaba, amma gogo a ta na akiza adama a akiza a na vu tawayi atsuma o lolo.

¹⁵ Na za na ri za vi Itoni shi ciga u lyawa za vi Itoni, she za vi Itoni zuwa yi wi isawan wan. Na cu'un ndolo fara, za vi Itoni ndolo ta faan a kasa. Nu u ri n yuwan, yi isawan na vali ko ka na ri za vi Itoni'i shi, adama a na Asula a ciga tsu ta aza e Itoni tsu danu na asuvu nden na ama. ¹⁶ N ta dansaa amaci a na a ri aza e Itoni: Kila ali a du a ta kuru Zamawawa fo adama a du. Ayi nda fo ne da u ri amayun a tyo ali aza e Itoni: Kila amaci a du a ta kuru Zamawawa adama a du.

I toni Zagbain kuci

17 Atsuma a a'isa a aza e Itoni suru n damma ta ama e isawan cine a danai a mantsa ma na Yesu Zagbain dangwa nle, reve Asula e de le o o'wo aza a yi. Gogo n ta dansaa du ne fo. 18 Iroci, vali na a padai uryumbu kafu wo o'wo za vi Itoni, she u ciga u pala aalana'a wan. Waru, na koto a pada yi uryumbu shi, she a pada yi uryumbu mantsa ma na u temei itoni yi Zamawawa wan. 19 Ko a pada yi uryumbu ko a pada yi uryumbu shi, ayi ndolo babu addama. Ili i na i ri ulobonu ayi da a yuwan ili i na Asula a dammai a yuwan. 20 I lyuwa elime cine i danai ana Asula e de ndu. 21 Avu agbashi a da? She vu lyawa ili i ndolo i balu wu wan. Amma na vu tsura ure u na voo o'wo faan, to, vo o'wo faan. 22 Aza a na a danai agbashi ana Zagbain de nle, o o'wo ta faan ana o o'woi e ekere a Zagbain. Ne da waru, aza a na a danai faan ana Zagbain de nle, gogo o o'wo ta agbashi a Zamawawa. 23 Asula a tsula du ta de. U tsupaa du ta na abunda lon. She i yuwan gashi agbashi aza a na a zuwai na 'yuwan a ciga a zuwaa ama atsuvu agba a zuwaa Asula atsuvu wan. 24 Ama a va, n dammisa du ta, yi isawan cine i ri ana Asula e de ndu, Asula a ta kamba du i yuwan tsundolo.

Uritosu adama a ama a na a ri na lolo shi

25 N ta dansaa du ama a na a ri na lolo shi. Zagbain zuwa wila wi ili i na aa yuwan shi, n ta dansaa du ili i na maa yuwusan majiyan. I ta usu ili i na maa damma du adama a na Zagbain to rocosu mu isa'ani. 26 Adama a addama a na aza e Itoni o sowuso, n ta dansaa aza a na koto a yuwain lolo shi a yuwan wan. 27 Amma ni i yuwan de lolo,

she yi kasa wan. I buwa ta babu i yuwan lolo? She i zami ka wan. ²⁸ Amma ko na vu zuwa ka, vu yuwan unusu shi. Waru ko usheli u yuwan lolo, ayi fo u yuwan unusu shi. Amma n ciga ta n kamba du adama a addama a na a ri pe atsuma a nden n lolo.

²⁹ Ama a va, n damma du ta mejege, mantsa ma na yaa danu atsuma o uvadi u nda u buwa abunda shi. Adama o ndolo mamantsa ma na ma buwa ntsu, tsu lungusa yi adama a majiyan mo lolo wan. ³⁰ Ni i ri e mesun adama a atsumolangu, i lyuwa elime a yuwusaan Zagbain aganda. Ni i ri e izo'oshi na mazanga, she i lyawa mazanga mo ndolo u putsaa du a na yaa yuwaan Zagbain aganda wan. Ni i tsura ili na abunda adama a aciyadu, ili i ndolo i putsaa du a na yaa yuwaan Zagbain Yesu Zamawawa aganda wan. ³¹ Ni i yuwan ili i na ama a tsu yuwusan atsuma o uvadi, she i lungusa mantsa ma du a majiyan me le wan, adama a na ili i na i ri pe atsuma o uvadi u nda suru o to koto babu usan.

³² N ciga du i dama adama e ili yu uvadi i nda shi. Za na ri na lolo shi, ta gura dana a yuwusan ulinga wu Zagbain, reve waru u yuwan majiyan me ili i na yaa zuwa Zagbai'in wu uwwa uyo'o. ³³ Amma za na ri na lolo u ta na addama a abunda. U ciga u 'yuwan, u yuwan majiyan me ili yu uvadi, ni ili i na waa yuwan tsara ka va yi uwwa uyo'o. ³⁴ U ta no okolo e re. Ka ko usheli u na u ri na lolo shi, u ta gura dana a yuwusan ulinga wu Zagbain, obolo na lipu na wuma wa yi. Amma na ka ri na lolo, u tsu ca ta mantsa a yuwusan ili yu uvadi waru u ciga ta vali va yi uwwa uyo'o wa yi. ³⁵ Ili i na i zuwai n

yuwaan ɗu cu'un va adanshi o ndolo gogo ayi ɗa n ciga ta n kamba ɗu, amma mu nla ɗu shi. N ciga ɗu ta i yuwan ili i na ama a Zagbain aa yuwan, tsara i yuwaan Zagbain aganda waru babu ili i na yee geshe ɗu.

³⁶ Amma nu ulobo waa yuwusan majiyan u zuwa eegebe a yi adama a na u ta maluwa ma na waa yuwan lolo lon, u yuwan lolo'o, unusu u ɗa shi. ³⁷ Agba nu u jiyan ta atsuma o ookolo a yi ili i na waa yuwan, agba babu vuma na zuwa niyi elime a na waa zuwa eegebe a yi, waru u ta gura guza aciyayi, u toni ili i na u jiyain de a na waa zuwa yi shi. Ayi fo u yuwan ta ili i na i la'ai ulobonu.* ³⁸ Na a yuwan lolo, u lobono ta. Na a yuwan lolo shi, u la'a tu ulobonu.

³⁹ Ka danu na vali va yi atsuma o lolo, hali she ukwa. Na cu'un ndolo fara u ta faan u yuwisan lolo ro, amma wo olo vali na ri za vi Itoni yi Zagbain. ⁴⁰ N ta majiyan u ta la'aa yi mazanga nu u lyuwa elime na nden n tsuruna, waru n ta a majiyan Ruhu va Asula fo ta dansa ne.

8

Inama i na a padayi amali

* **7:37** Waru u ta gura o o'wo urevu wu uguzu'u ayi ɗa: A damma dada ta putsusaa usheli wa yi she u yuwan lolo wan, agba a'wan a yi a ciga ta a kara lolo. Na ayi dada we ene wu ntsaa ta u geshe yi, amma gba ayi mawun ma ka u ciga ta u yuwan lolo she u putsaa yi wan. Unusu u ɗa shi. A damma o okolo a dada u zuwa ta de okolo a na wee geshe usheli'i u putsaa a na waa yuwan lolo agba za ro ɗa zuwa niyi elime tsara u putsaa usheli'i na lolo shi. U toni ili i na u fofoi o okolo a yi mawun ma ka u dana lo babu na u yuwain lolo. Ayi ndolo fo ili i sa'ani i ɗa.

¹ Gogo n ciga t̄a n yuwan adanshi adama e inama i na ama a paɗai adama a kucci vā aṃali. Suru ntsu tsu reve t̄a ili i ro adama e ili i ndolo. Adama o urevu tsu tsu 'yaṣan t̄a avangaci ā tsu nu uvaɗu, amma icigi i tsu zuwa tsu t̄a tsu kambulai. ² Nā vuma aa yuwusan majiyan ma na u ri nu urevu, koto u tsurā urevu wa amayun shi. ³ Amma vuma na cigai Aṣulā, āyi ɗa Aṣulā e revei waru u t̄a kālyuwā yi.

⁴ Apa ili i na maa dansa adama o utamu wi inama i na a paɗayi aṃali: Tsu reve t̄a aṃali ili i ro i ɗa shi ātsumā o uvaɗi, waru tsu reve t̄a Aṣulā ā t̄a a ɗa goon. ⁵ Ā tsu ɗe t̄a ili nā ābunɗa ɗe zuwa nā pa o uvaɗi “musulā” na “azagbain” agba “musulā” na “azagbain” a amayun a ɗa shi. ⁶ Amma tsu reve t̄a tsu t̄a nā Aṣulā ā t̄a goon, āyi ɗa Dada, za na yuwain ili suru, u yuwan tsu t̄a tsarā tsu yuwaan yi āgaɗā. Yesu Zamawawa āyi ɗa Zagbain tsu goon. Babu ili i na u kuɗai a yuwan, waru adama ā yi a ɗa tsu tsurāi wuma.

⁷ Amma ama suru a ɗa e revei amayun a nda shi. Ozo o ro a ta zuwusa okolo e le bātā ā aṃali o ndolo, ɗaɗa i zuwai hali na ana'an na aa tamusa cu'un vi inama i ndolo, a tsu buwa t̄a a majiyan inama'a āzā ā aṃali a ɗa. A ta yuwusan majiyan na a lyuwa cu'un vi ilyalya i ndolo u t̄a kambāto le idaba. A ta yuwusan majiyan ne adama a na asuvu e le ā ri nu ucira u na aa gura kurato isa'ani ni iwuya mejege shi. ⁸ Amayun a ɗa ilyalya i ɗa yaa rawato tsu zuzu nā Aṣulā shi. Nā tsu lyuwa yi shi, tsu lamba ili i ro shi ko ke'en. Waru nā tsu lyuwa yi, tsu tsurā ili i ro shi.

⁹ Amma i yuwan ugbozu. She i lyawa fāan na

yaa lyuwa cu'un vi ili i ndolo wo o'wo ili i na yaa zuwa aza a na a ri nu ucira a majiyan mo okolo e le shi a riyā wan. ¹⁰ I reve ta amali ili i ro i da shi, adama o ndolo waa damaton du i 'yawa i lyuwa ilyalya a aa'isa a amali shi. Amma na vuma na asuvu a yi a ri nu ucira shi we ene du a tamusa, avu fo u ciga u tama. ¹¹ Adama o ndolo urevu wa wu u lungusa ta vuma na ri nu ucira'a shi za na Zamawawa kuwayi. ¹² Na vu yuwaan aza a wu cu'un vu unusu ndolo, hali vu zuwa le a yuwan ili i na a tarai unusu u da, avu fo vu ta yuwusaan Zamawawa unusu. ¹³ Ni ili i na maa tama waa zuwa moron ma va ma yuwan unusu, maa dashi tama nama shi, hali n kuwa, adama a na n ciga yi u riyā shi.

9

Unata u da Bulu ri na akapi a ajiya

¹ Amu n ta faan. Amu aajiyaƙ a da. Me ene ta Yesu Zagbain tsu, waru adu da utsuru wu ulinga u na Zagbain aa yuwusan o ukere u va. ² Ko shi na za ro tara amu aajiya a da shi, amayun e ekere a du amu aajiya a da. Adama a na i ri uboluloi na Zagbain u roco ta amu a aajiya a da.

³ Apa ili i na n tsu usu aza a na a tsu ciga a yuwan adanshi o uge'etosu a aci a va: ⁴ Tsu ta na tsaa ushi ilyalya adama o ulinga u na tsu yuwain. ⁵ Ajiya a na a buwai na azawawa'a a Zagbain, na Bituru a tsu walasa ta na amaci e le aza a na a ri aza e Itoni atsuma a mmalu. Tsu ta na tsaa yuwan ne fo. ⁶ Amu na Banaba da goon na tsu ciga tsu 'yuwan tsu linga adama tsu tsura ikebe yi ilyalya?

⁷ Na soja 'ya_wa ba_ta o uvon, u ta tsulaa aci_yayi ily_yalya? Za ta lo na tsu cu'_wan u_duma_re ve u lamba a lyuwa itana yu u_duma_r'a? Za va agu_ba ta lo a gu_busa ikyon reve u ku_da o sowo maani me le? ⁸ Maa dansa ili i nda o uyuwun u va shi, amma ne da fo Wil_a wa Asu_la u dammai. ⁹ Tse ene ta a Wil_a u na Musa danai: "She vu ba_ru un_a wu nan ayi a dadasa ishina wan."* Ana Asu_la a dammai ne, majiyan me inan ma da goon u shi na ayi? O'o! ¹⁰ Adanshi a tsu a da u shi a yuwusan. Za na ri e iluma na za na ri a faba a ta yuwan ulinga u le na a zuwusai okolo a na aa tsura akunda atsuma e ili i na a gasai. ¹¹ Ana tsu damma ndu ikaka'a ili i ta i da na ca'an vi icu'un va Asu_la o okolo a du. Adama o ndolo tsu ta na tsaa ushi ilyalya ni ili i ro gashi ugasa u tsu ya'a du. ¹² Ni i kamba ama o ro a na a yuwusaan ndu alajiya, atsu tsu la'a le ta ntsaa.

Agba koto tsu zuwa du i ca tsu ne shi. O un_a u ndolo, tsu ta yuwusan ulinga ni ili i na tsu ri na ayi adama tsu geshe Alabari a Sa'ani a Zamawawa a na waa baza wan. ¹³ I reve ta aza a na aa yuwusan aganda atsuma a Aa'isamapada a tsu ushishi ta ilyalya i le pe. Ne da waru nan ganu aza a na aa padasa kucci vi inama a asa'a a tsu ushishi ta akunda e inama'a. ¹⁴ Ne da fo Zagbain roco ta a na aza a na aa yuwusan alajiya a Alabari a Sa'ani a ushishi ilyalya i le adama o ulinga'a.

¹⁵ Agba koto n zuwa du i ca tsu ne shi. Waru maa danasaa du ili i nda gogo adama a na n ciga ndu i ca mu ili shi. Me ene ta gashi u la'aa mu ta n kuwa

* **9:9** Atsuma a rana ndolo, na a ciga a faba ishina, inan i tsu dadasa le ta a 'ya_wa na a kambi e ishina'a.

a na yaa yuwan ne. ¹⁶ Maa 'yasasan avangaci adama a na maa yuwusan alajiya a Alabari a Sa'ani shi. Ulinga u ndolo u da Asula a zuwa numu n yuwan, agba na n ciga n 'yuwan n yuwan yi. Woo yo'ono mu shi na n yuwan yi shi! ¹⁷ Na n yuwan ulinga u nda adama a na amu na aciyava n dangwai n yuwan yi, u to lobono i tsupa mu. Amma n ta yuwusan ulinga u nda mejege adama a na Asula a da za na zuwa niyi e ekere a va. ¹⁸ To, atsupu a nye a da maa ushi? Ayi da nda n ciga ta n yuwan alajiya a Alabari a Sa'ani faan, agba maa zuwusa ama a tsupa mu adama o ulinga u nda shi.

¹⁹ Amu aagbashi a za da shi, agba avu n kambato aciyava aagbashi a ama suru adama n lyuwa aci a ama na abunda. ²⁰ Na n ri obolo na aza a Isra'ila, n tsu yuwan ta tsu za va Isra'ila adama n lyuwa aci e le. A ta zala Wila wa Musa, amu gba shi. Agba n ta kurusu Wila'a mejege adama n lyuwa aci e le. ²¹ Ne da waru, na n ri obolo na Atakpaci, reve n yuwan tse le, aza a na oo tonon Wila shi, adama n lyuwa aci e le. Ayi nda woo rocosu n 'yuwan ta a kuru wila wa Asula shi, amma n ta kurusu wila wu Zamawawa. ²² Na n ri obolo na aza a na Itoni i le i ri ugbamu lon shi, n tsu yuwan ta gashi amu fo n ri ugbamu lon shi, adama n lyuwa aci e le. N ta yuwusan ununa ama aa yuwusan ubata bita adama n yuwan atyo a na maa gura yuwan adama n lyuwa aci a za na bita maa gura. ²³ N ta yuwusan ili i nda suru adama m baza Alabari a Sa'ani, waru n ta uwwusa uyo'o adama a aba'un a Asula.

²⁴ I cuwan na a yuwusan ala'anlai e iladi, koyan tsu suma ta, agba vuma ta da tsu tsura iliyinkapa. Adu fo ni i ciga i 'yuwan i suma cine yaa lyuwa.

²⁵ Za na ri e iladi ya ala'anlai biti u tsu fobuso ta aciyayi lon adama u lyuwa une'e wo ookokoloƙa a avu'un a na aa jima shi. Amma tsu to fobuso aciyatsu adama tsu lyuwai une'e wo okokolo a na oo koto shi. ²⁶ Ayi da i zuwai ma sumusa mejege. Ayi da i zuwai maa dakanusu tsu za na ri a nlangi nu ukere wa yi ukukumuwu adama u lyuwa, agba ana za na a falishi atsuma o upepu shi. ²⁷ N ta dukusa lipu va reve n kambuwa yi aagbashi a va adama a na na n tawa n koto a yuwusaan ozo o ro alajiya, Asula a putsaa mu ni iliyinkapa wan.

10

She iyuwaan musula n ro aganda wan

¹ Ama a va, n ciga du ta i cuwan ni ili i na i farai na nkaya n tsu aza a na a kuruyi Musa. Asula a walaa le ta elime ana u lyunguyi eleshe a na a walai elime e le, reve u pasato le a Mala ma Shilit ni ida yu u'yewu. ² Ne da Asula a rumbu nle reve o o'wo otoni a Musa atsuma e eleshe na a mala. ³ Suru nle a lyuwa ta ilyalya i na yu utai zuva. ⁴ Suru nle o sowo ta mini ma na mo utai nu ucira wa Asula. Mini mo ndolo mo utai ta a aatali diga zuva a na e shewun nle, ayi aatali o ndolo gba Zamawawa da. ⁵ Agba suru na ne, na abunda e le Asula a uwwa uyo'o u le shi. Adama o ndolo a da a kuwai, reve lipu le o o'wo ubazu atsuma o una.

⁶ Ili i nda i fara ta adama wo o'wo iroci a tyo ya'a tsu, adama u tiga tsu tsu lyawa icigi yi iwuya ununa ama o ndolo a yuwain. ⁷ She i yuwaan amali aganda cine ozo o ro e le a yuwain wan. Adanshi a Asula a damma, "Ama'a a yuwan ta

mere reve a yuwan aḅuki a vanvama nu uje'en.”
⁸ Reve ozo o ro e le a yuwan tsipere, adama o ndolo a ḁa gba, a tyo ama ukpakukupa ushin nu ukpakukupa uta'atsu (23,000) a kuwaḁi urana u ta. She tsu yuwain unusu ununa a yuwain wan. ⁹ She tsu lyungwaḁi Aḁsulazuva cine ozo o ro e le a yuwain wan, reve gba a kuwaḁ ana iyo yi kaḁa nle. ¹⁰ Waru she i yuwan adanshawuya cine ozo o ro e le a yuwain wan, adama o ndolo a ḁa Aḁsula a lyunguyi malingata ma yi mo ukwa wu una le.

¹¹ Ili i nda suru i fara ta adama e iroci. A ḁana le ta adama o rono tsu atsuvu, adama a na mantsa mo ukosu ma yuwan ta zuzu. ¹² Na vu ri a majiyan gashi vu ta mishin, vu yuwan ugbozu adama vu riyā wan. ¹³ A mantsa ma na a lyungwaḁ ndu suru, i cuwan a ta lyungusa akapi a ama ne fo. Aḁsula a tu uguzu na nzuwulai ma yi, agba waa lyawa maḁyungwa'a ma la'a ucira u na yaa kaḁa asuvu shi. A mantsa ma maḁyungwa'a, u ta ca du ucira u na yaa gura kaḁa asuvu, ne ḁa Aḁsula aa ca du ure u na yaa lyuwa elime.

¹⁴ Ama a va, adama o ndolo, i suma itoni ya amaḁi. ¹⁵ Adu ama a na a ri nu ugbozu u ḁa. I yuwan majiyan na aciyaḁu ko ili i na n cigai madamma amayun a ḁa. ¹⁶ Na tsaa cuwusan mantsa ma na Zagbain tarai opopofu, reve tsu sowo masayan ma inabi, avu tsu godyoo Aḁsula adama a yi, tsu ta na akunda atsuma a mpasa mu Zamawawa. Na tsu tara opopofu reve tsu ne'eshen tsu tama yi, tsu ta tsura akunda a lipu vu Zamawawa na amayun. ¹⁷ Ana tsu ne'eshein opopofu a ta, tso o'wo ta lipu ta, ko a na tsu ri aḁunda.

¹⁸ I cuwan na ama a Isra'ila, za suru reve ta na a pada kucci a masa'a, aza a na a tamai inama i ndolo suru, a ta tsuru aba'un a kucci'i. ¹⁹ Maa dansa amali ko ilyalya i na a yuwayin amali kucci ili i da shi. ²⁰ Amma n ta dansa ili i na a cayi amali, kucci vo otoni a limaf a da, agba Asula a da a cayi shi. Agba n ciga du yoo o'wo ili i ta no otoni a lima shi. ²¹ Yoo sowo o mokoto ma Zagbain reve waru i sowo o mokoto mo otoni a lima shi. Yaa lyuwa ilyalya i na a cayi Zagbain reve waru i lyuwa ilyalya i na a cayi otoni a lima shi. ²² Tsu ciga ta tsu zuwa Zagbain tsushu'un? Tsu te inda tsu ta nu ucira u na tsa'a 'yuwan Zagbain reve u kuda a ca tsu atsumalima?

A ca Asula tsugbain kuci

²³ Ozo o ro atsuma a du i ta dansa, "Tsu ta yuwan ili i na tsu cigai biti!" Amma n ta dansaa du ili biti i da i ri ulobonu u na yaa yuwan shi. I ta gura damma, "Tsu ta yuwan ili i na tsu cigai fo!" Amma n ta dansaa du ili biti i da i ri ni ikambi shi. ²⁴ She i dana e izami yi ili i na i ri ulobonu ya'a du goon wan. Amma i zami ili i na i ri ulobonu e ekere a akapi a ama.

²⁵ I tama inama i na aa winasa e eden. Agba ye ece ko a yuwaan ta amali kucci ne ele wan, ne da asuvu a du a dana nden. ²⁶ Adama a na Adanshi a Asula a damma ta, "Uvadi ni ili i na i ri pe atsuma a yi suru za vu Zagbain da." ◇

²⁷ Na aza a na a ri aza e Itoni shi, e de du i lyuwa ilyalya, reve i ciga i lyuwa, to, i lyuwa ili i na a ca ndu biti. She i yuwan yeci i ro wan, adama a na yeci'i u ta tawaa na addama. ²⁸⁻²⁹ Amma na vuma

◇ 10:26 Ica 24:1.

ro damma ɗu, “Ilyalya i nda a ca ta amali.” To, she i lyuwa ilyalya i ndolo wan, ko asuvu a ɗu a tara yi unusu u da shi. She i lyuwa wan, adama a na za na damma ndu'u, u tara ta unusu u da ni i lyuwa.

Adama a nye aa 'yasan mu a yuwan ili i na n ri faan na maa yuwan, adama wo o'wo unusu a asuvu o ozo o ro wan? ³⁰ Na moo godyoo Asula adama e ilyalya'a reve n lyuwa yi, adama a nye e de numu za vu unusu?

³¹ Na yaa lyuwa, ko i sowo, ko i yuwan ili i ro, i yuwan ili biti cine aa ca Asula tsugbain. ³² She i yuwan ili i ro na yaa nusaan aza a na a ri aza a Isra'ila, ko Atakpaci, ko aza e Itoni wan. ³³ Yuwain cine n tsu yuwan. N ta yuwusan mpolo n na koyan da a uwwa uyo'o atsuma e ili i na maa yuwusan suru. Maa zamishi ili i na yaa tawaa mu ni ili yu ulobonu shi, amma n te izami yi ili i na i ri ulobonu e ekere a koyan da adama a wawa le.

11

¹ Ni i ciga i 'yuwan i kuru iroci i va, ununa amu maa kurusu iroci yi Zamawawa.

Uritosu adama a aganda

² N ta cuwusa ɗu adama a na yaa cuwusan na amu kuci, avu waru i kuru ili i na n rito ndu.

³ Agba n ciga ɗu ta i reve nda: Zamawawa ta na tsugbain a aci a vali, vali waru u ta na tsugbain a aci a ka va yi, Asula waru u ta na tsugbain a aci a Zamawawa. ⁴ Vali na suru pupalai aaci a yi a mantsa ma na u ri a avasa ko a yuwusan uritosu wa Asula u ta tawusaa Zamawawa na wono. ⁵ Amma ka na suru pupalai aaci a yi shi a mantsa ma na u ri a avasa ko o uritosu wa Asula

u ta tawusaa vali va yi na wono. Ka ndolo ili i ta i da na ka na a punai ogbondo adama wo o'wo iroci yi ili i wono. ⁶ To, nu u 'yuwan a pala aaci a yi a puna yi ogbondo. Agba ana wo o'woi ili i wono i da ubata a ka a puna yi ogbondo, to, wu pala aaci a yi. ⁷ Asula a yuwan ta ali oroci a yi adama a ca yi tsugbain. Ayi nda u roco ta she vali oto ili i ro a aaci a yi wan. Asula a yuwan ta amaci a tawaa ali e le na tsugbain. ⁸ Asula a yuwan vali vu ufaru diga atsuma a ka shi, amma wu utaa ta ka vu ufaru diga a vali. ⁹ Asula a yuwan vali adama a ka shi, amma u yuwan ta ka adama a vali. ¹⁰ Adama o ndolo a da ka a pupala aaci a yi adama u roco u ta zalā tsugbain tsa vali va yi, adama a nlingata ma Asula waru.

¹¹ Atsuma e Itoni i tsu yi Zagbain, a kasa amaci atsuma a ali shi, ali waru a kasa le atsuma a amaci shi. ¹² Amayun a da ka vu ufaru wu utaa ta diga a vali, amma amaci a da a matsain akapi a ali. Agba Asula a da za na yuwain ili biti. ¹³ Ecei aciyadu, na ka yuwan avasa babu aaci a yi wupalu, ili i ndolo ili i wono i da shi? ¹⁴ Ye ene ure u na Asula a yuwain o uvaɗi, na vali ri na anji zakpakpa ili i wono i da shi? ¹⁵ Agba na ka ri na anji uga'an, ili i sa'ani i da. Asula a ca yi ta anji ne wo o'wo aapalutsu. ¹⁶ Hali n gogo ama o ro a ta ciga a yuwan mawasan adama e ili i nda, amma n ta dansa atsu na akapi a a'isa a aza e Itoni tsaa yuwusan ili i ro ko'o shi.

Adama e Ilyalya yi Zagbain

¹⁷ Atsuma o uritosu u na n cigai n roco du, maa cuwusa du shi, adama a na a mantsa ma na i

bolotoi suru, yaa yuwusan ili i sa'ani shi, reve i reme a yuwusan ili i vama. ¹⁸ O ufaru, mu uwwa ta a na ni i boloto i tsu ne'eshen ta aciyađu koko'o, agba n usu ta a na ili i ro i na a dammai amayun a da. ¹⁹ Amayun a da i ta pe une'esun koko'o, ne da e reve aza a na a yuwusan ili i na i ri mejege. ²⁰ A mantsa ma na i bolotoi, i ta a majiyan i ta lyuwusa Ilyalya yi Zagbain, agba ne da u ri shi. ²¹ Adama a na ni i ri a alya, i tsu gadaṛa ta adama i zazan ili suru reve gba akapi a ama a dana na ambulu. Ozo o ro gba hali o o'wo usowu! ²² I ri na 'wa na yaa lyuwa i sowo shi? Ko i tara ta aa'isa a aza e Itoni a Asula ili i na i ri aḅula shi? Ko i ta casu alambi wono? Nye i da i lobonoi na maa damma du? I ciga ta n cuwa du a na yaa yuwusan ne? Maa cuwa du shi, ko ke'en!

²³ Zagbain da ca numu ili i na n rito ndu. Atsuma a ayin a na a winai Yesu Zagbain, u tara ta opopofu. ²⁴ Reve u godyoo Asula adama a yi. Reve wu busa yi mubishi mubishi avu u damma, "Nda lipu va da, za na n cayi kucci adama a du. I yuwusan ne adama u zuwa du i dana a cuwusan na amu." ²⁵ Ne da waru, ana a lyuwai ilyalya, reve u tara mokoto ma masayan ma inabi,† avu u damma, "Mokoto ma nda akucunu† a sa'avu a Asula a da, za na o rocoi amayun a da adama a mpasa n va. I yuwusan ne adama u zuwa du i cuwusan na amu a mantsa ma na yoo sowuso yi kuci." ²⁶ A mantsa ma na yaa tamusa opopofu a nda ni i sowi mokoto ma nda biti, i ta dansa na Zamawawa kuwai. I yuwusan ne hali u kamba.

²⁷ Adama o ndolo na za ro atsuma a du tama opopofu a Zagbain ko u sowo o mokoto ma yi o

ure u na u ca niyi tsugbain shi, u yuwan t̄a unusu e ekere a lipu na mpasa mu Zagbain. ²⁸ Adama o ndolo a da vāa kālyuwā aciyawu kafu vu tama opopofu'u ko sowo o mokoto'o. ²⁹ Adama a na na vu ri nu urevu wu ucuduwu u lipu wu Zagbain shi a mantsa ma na vaa tamusa opopofu'u avu vu sowo o mokoto'o, vu te ge'etosu aciyawu na vu tama vu sowo. ³⁰ Ayi da i zuwai ozo o ro a du na abunda a ri ubanakun o o'woi takalya, ozo o ro gba shi a kuwai. ³¹ Na tsu kālyuwā aciyatsu kafu tsu lyuwa tsu sowo, Asula ee ge'eto tsu shi. ³² Agba Zagbain tsu ge'etosu t̄a nu u bari ntsu adama a tyo o ukosu Asula a ri na woo kototo tsu shi, a mantsa ma na woo kototo uvadi.

³³ Adama o ndolo ama a va, a mantsa ma na i bolotoi i lyuwa Ilyalya yi Zagbain, i puroloi. ³⁴ Waru no ozo o ro a uwwusa ambulu a lyuwa ilyalya ne'en a 'wa le, adama Asula e ge'eto du a mantsa ma na i ri alyo obolo wan.

N ta damma du ili i na yaa yuwan adama a akapi e ili, na n tawa.

12

Ne'e koko'o

¹ Ama a va, gogo n ta danaa du adama e ne'e na Ruhu va Akiza tsu ca koyan da atsuma a tsu.

N ciga du t̄a i reve ili ya amayun adama e le. ² N ciga du t̄a i cuwan kafu yo o'wo aza e Itoni yi Zagbain, a kuru t̄a na adu o ure u na u ri mejege shi, reve i yuwaan amali a na a tsu yuwan adanshi shi aganda. ³ N ciga du t̄a i reve na Ruhu va Asula ri obolo na vuma, vuma ndolo a damma, "A yuwaan t̄a Yesu un!" shi. Waru ko za lo aa damma, "Yesu

Zagbain da” shi, she na Ruhu va Akiza zuwa yi u yuwan ne.

⁴ Ne'e ta lo koko'o, agba suru Ruhu ta da aa casu le. ⁵ Re ta lo koko'o na tsaa yuwusan ikambi, agba suru ntsu Zagbain ta da tsaa yuwusaan aganda. ⁶ Ama a ta yuwusan linga icu'un icu'un, agba Asula a ta a da a cayi vuma biti ucira u na waa yuwan cu'un vu ulinga u ndolo.

⁷ Ruhu tsu roco ta aciyayi atsuma a za vi Itoni† biti ana u ca niyi ulinga ko'o na waa kamba aza e Itoni suru. ⁸ Ruhu va Asula tsu ca ta vuma ucira u na waa ca asala o ugbozu. Ruhu da da waru tsu ca za ro ucira u na waa yuwan adanshi a na a ri tapu nu urevu. ⁹ Ruhu ta da da waru tsu ca za ro ucawu wo okolo a gbain. U tsu ca ta za ro ucira u na waa kambato aza o ubanakun gbaga. ¹⁰ U tsu ca ta za ro ucira u na waa yuwan ulinga wa asalama,† reve waru u ca za ro ucira u na waa damma ikaka ya Asula. U tsu ca ta za ro ucira u na waa kurato ili i na ya utai ubata wa Asula ko ubata u ro. U tsu ca ta za ro ucira u na waa yuwan adanshi ne elentsu o ro. Reve waru u ca za ro ucira u na waa gura cu duwa ili i na a dammai ne elentsu koko'o. ¹¹ Ayi da waru Ruhu va Akiza ta goon za na aa casu ne'e nda. Ayi a nde'en da tsu ca cu'un vu une'e u na u tsu ntsaa koyan.

Lipu vu Zamawawa na pasu va yi

¹² Lipu vuma ili i ta i da, agba u ta na pasu koko'o. Ko a na wo o'woi lipu ta na pasu koko'o, pasu ndolo o boluloi ta reve o o'wo lipu ta goon. Ne da fo lipu vu Zamawawa ri. ¹³ Ozo o ro a tsu aza a

Isra'ila a ɗa, ozo o ro waru Atakpaci* a ɗa. Ozo o ro waru agbashi a ɗa ozo o ro waru gba shi a ta faan. Amma Ruhu va Asula rumbu ta koyan tsu reve u zuwa tsu tso o'wo upasu u lipu vu Zamawawa. Suru ntsu tsu ushi ta Ruhu ta.

¹⁴ Amayun, lipu ta na pasu icu'un icu'un, agba upasu u ta goon shi. ¹⁵ Na anana a damma, “Amu upasu u lipu u ɗa shi, adama a na amu ukere u ɗa shi,” ili i nda i geshe yi ta a na woo o'wo upasu u lipu'u? O'o! ¹⁶ Waru nu utsuvu u damma, “Amu upasu u lipu u ɗa shi, adama a na amu utsuvu u ɗa goon agba lyusu ɗa shi,” ili i ndolo i putsaa yi ta a na wo o'wo upasu u lipu? O'o! ¹⁷ Na lipu suru lyusu ɗa, cine waa uwwa? Waru nu utsuvu u ɗa u shi goon, cine wa uwwa maguru? ¹⁸ Amma Asula a yuwan ta lipu tsu na pasu abunda, reve gba u zuwa upasu suru ubata u na u ciga niyi. ¹⁹ Ili i wovon i ne i ɗa lipu shi o'wo nu u shi upasu u ta goon! ²⁰ To, lipu ta na pasu va abunda, amma lipu ta ɗa goon.

²¹ Lyusu aa damma ukere, “Ili i bura mu na avu” shi. Aaci aa damma ana, “Ili i bura mu na avu” shi. ²² Pasu lipu na rotsoi gashi a ri nu ucira shi, amayun ele ɗa a la'ai ulinga. ²³ Pasu lipu ro na tsu tarai gashi a la'ashi ulinga shi o ta lo, agba ele ɗa tsu la'a kambuwayi ugbozu o ugolobuso u le. Atsu tsu pala ta lipu tsali tsu adama ama e ene le wan, ²⁴ agba tsu ta gura lyawa upasu u ro babu pupala. Asula e gere ta lipu tsu hali na pasu na tsu tarai a ri nu ulinga shi, a ta gba nu ulinga.

* **12:13** Vuma na danai aatagada a nda u yuwan ta ulinga na danshi “Nheleni” a yuwusan adanshi a Takpaci.

²⁵ U yuwan ta ne adama u zuwa pasu lipu'u suru a linga obolo, upasu suru a kambusa za va yi. ²⁶ Nu upasu u lipu u ro u sowo atsumalima, akapi a pasu a tsu uwwa yi ta. Na a ca upasu u ro tsugbain, to, akapi a pasu a tsu yuwan ta mazanga obolo na ayi.

²⁷ Suru ndu suru lipu vu Zamawawa da. Koyan atsuma a du upasu u da a lipu va yi. ²⁸ Apa nda pasu ro na Asula a zuwai atsuma a lipu vu Zamawawa. Ele da: U fara ta zuwa ajiya, za ve ire, aza a na a yuwusan alajiya e ikaka ya Asula, za va ta'atsu munlu. Reve u toni na aza a na a yuwusan linga va asalama, na aza a na a ri nu ucira u na a kambato ama gbaga. Reve waru u zuwa aza a na aa kambusa ozo o ro, na azagbain. Reve u zuwisa aza a na aa yuwusan adanshi ne elentsu icu'un icu'un. ²⁹ Vuma suru da aajiya? Ko ke'en ne da shi. Za suru da a yuwan alajiya e ikaka ya Asula? Suru da munlu? Za suru da ri nu ucira u na waa yuwan linga va asalama? ³⁰ Suru da a ri nu ucira u na aa kambato ama gbaga? Asula a ca ta suru ntsu ucira u na tsa a yuwan adanshi ne elentsu icu'un icu'un? Vuma suru da aa gura cuduwa ili i na a dammai ne elentsu icu'un icu'un? O'o! ³¹ Amma na amayun i zuwa okolo a na yaa tsura ne'e na la'ai.

Gogo n ta damma du ili i na i la'ai suru suru.

13

Icigi

¹ Na maa yuwan adanshi ne elentsu o ro a ama ko hali ne elentsu a nlingata ma Asula, agba waru na n ri ni icigi ya ama shi, adanshi a va o rotso

tā ilama i malapa mā rumu, ko ilama yu ulingi.*
² Nā Ruhu ca mu ucira n yuwan alajiya e ikaka ya
 Asulā agba n ciga ama shi, ili i ro i da n ri shi. Ne
 da waru nā n gura reve ili biti, hali ni ili i na i ri
 usokowu suru suru. Ne da waru nā n ri nu ucawu
 wo okolo hali na maa gura damma masasan maa
 shuwa ubata u ro, reve u yuwan ne. ³ Nā n ca
 alambi ili i na n ri ne ele suru, hali gba nā n ca lipu
 va kucci vu ukulatosu, agba nā n ciga ama shi, wo
 o'wo mu tā ulinga we pere.

⁴ Icigi i tā na ankuri nu ulobonu. Icigi i ri
 nā tsushu'un shi. Icigi i tsu yuwan adanshi nu
 u'yaasan wa avangaci shi. U tsu tara aciyayi ili
 i ro shi. ⁵ U tsu yuwan adanshi adama u sudato
 ozo o ro asuvu shi. U tsu danā o mpolo n na waa
 tsuraa aciyayi ili shi. U tsu yuwan upan go'o shi.
 U tsu cuwan unusu u na ama o ro a yuwaan niyi
 de shi. ⁶ U tsu yuwan mazanga adama a na ili i
 wuya i farai shi, amma u tsu yuwan tā mazanga
 na amayun o uta a alanga e eteshe. ⁷ Icigi i tsu
 bula mayan me icigi shi, u tsu kufa a usu shi, u tsu
 danā tā nu uzuwu wo okolo kuci, waru u tsu kaba
 tā asuvu kuci.

⁸ Icigi i tsu koto shi. Ne'e na aa yuwan alajiya
 e ikaka ya Asulā o to koto. Ne'e na aa yuwan
 adanshi ne elentsu icu'un icu'un o to koto. Ne'e
 vu urevu fo to koto. ⁹⁻¹⁰ A mantsa ma nda une'e

* **13:1** Ele nda a tsu yuwan tā ulinga ne ele atsuma a aganda a
 amali. Elemu a na a yuwusan waa tawusaa nā tsugbain e ekere
 a Asulā a wuma shi. Tsundolo, nā vuma ro yuwan adanshi ne
 elentsu o ro agba wu pe ada tsara u kamba aa'isa a aza e Itoni shi,
 ne da da elemu a na amali a tsu yuwusan atsuma a aganda a amali
 waru u tsu tawaa nā tsugbain e ekere a Asulā a wuma shi.

u tsu wu urevu nu ucira u na tsaa yuwan alajiya e ikaka ya Asulā a ri ushiwun shi, mantsa ma na za vu ushiwun tawai, dada une'e u na u ri ushiwun shi waa buwa nu ulinga waru shi. ¹¹ Ana n shi mawun, n yuwusan ta adanshi ununa mawun ma tsu yuwan, n yuwusan ta majiyan ununa mawun ma tsu yuwan, n tawusa ta na re gashi mawun. Ana n kungwai, reve n lyawa a yuwusan ununa mawun ma tsu yuwan. ¹² A mantsa ma nda, tsu te inda ili ya Asulā, agba tsu te inda le akapi, ununa i tse ene ululu wa'a ni i kalyuwa a madubi. Mantsa ma ta lo aa tawa na tsee ene Asulā esu esu. Gogo wa'a da goon n revei, amma a mantsa'a n te reve suru suru, ununa Asulā e reve numu suru suru.

¹³ Ili i ta'atsu i nda o ta lo no oo koto shi: ucawu wo okolo, uzuwu wo okolo ni icigi, agba za na la'ai atsuma e le suru suru ayi da icigi.

14

Udashiwu wu uritosu adama e ne'e Ruhu

¹ I yuwan atyo a na yaa yuwan tsara i ciga ozo o ro. Waru i zuwa okolo tsara i ushi ne'e na Ruhu va Akiza aa ca du. Agba une'e u na u la'ai ayi da une'e wa alajiya e ikaka ya Asulā. ² Aza a na aa yuwusan adanshi ne elentsu o ro, aa yuwusaan ozo o ro a na a uwwusa le adanshi shi, amma a tyo a Asulā za na a uwwusa le. A ta yuwusan adanshi a amayun e ili yu usokowu nu ucira u Ruhu va Akiza. ³ Amma aza a na a yuwusan alajiya e ikaka ya Asulā a ta yuwusaan ama adanshi reve waru a ca le ikambi, nu ugbamu wa asuvu, nu ucasu wa adanshi adama a tsura asuvu nden. ⁴ Aza a na a yuwusan adanshi ne elentsu o ro, aciyele a da aa

kambusa goon, amma aza a na a yuwusan alajiya e ikaka ya Asula a ta kambusa aa'isa a aza e Itoni suru. ⁵ N ta dansa, u ta dana ulobonu suru ndu i yuwan adanshi ne elentsu o ro. Amma u ta la'a ulobonu suru ndu i yuwaan ama alajiya e ikaka ya Asula. Une'e u ndolo u la'a ta une'e u mayan ma adanshi ne elentsu o ro. Une'e wa adanshi ne elentsu o ro u tu ulobonu na za ro gura cuduwa ili i na a dammai, adama aa'isa'a mabula u tsura ikambi.

⁶ Ama a va, na n tawa n yuwaan du adanshi ne elentsu o ro, cine ili i ndolo yaa kamba du? Ili i ndolo yaa kamba du shi, ko ke'en, she na n damma du ili i na Asula o roco numu, ko na n damma du ili yu urevu, ko ikaka i na Asula a ciga numu n damma du, ko uritosu. ⁷ Ili i wivulu gashi papin ko ili mawa'a ko kumburu a ri wuma shi. Babu za na ee reve ishpa i na aa wa'asa, she na za mawa'a u wa'a yi a alanga eteshe. ⁸ Na aavana a na oo rocosu asoja ure wu uvon u ca mesun ma sa'ani shi, cine tsa da asoja'a oo fofo adama e teme uvon?

⁹ Ne da waru, babu za na ee reve ili i na yaa dansa, she ni i yuwan adanshi a alanga eteshe. Na ne da shi, vu ta dana a yuwusan adanshi o upepu goon.

¹⁰ Tsu ta ne elentsu icu'un icu'un atsuma o uvadi u nda, agba babu za na ri lo elemu goon reve u lamba urevu. ¹¹ Na vuma ro yuwan adanshi ne elentsu a na mu uwwai shi, tso o'uloi ta omocin.

¹² Na amayun a da i cigai ne'e Ruhu, i pati Asula a ca du aza a na aa dana ni ikambi atsuma a aa'isa a aza e Itoni mabula.

¹³ Vuma na ri nu une'e wa adanshi ne elentsu o ro, u yuwan avasa tsara a ca yi fo une'e wu ucuduwusa wi ili i na u dammai. ¹⁴ Na n yuwan

adanshi ne elentsu o ro, ruhu va da aa yuwusan avasa, amma amu aciyava n reve ili i na maa dansa shi. ¹⁵To, nye maa yuwan? N ta yuwan le ra. N ta yuwan avasa atsuma a ruhu, waru n ta yuwan avasa ni idanshi i na n revei. N ta cana ishpa atsuma a ruhu, waru n ta cana ishpa ni idanshi i na n revei. ¹⁶Ni i boloto ubata u ta, ni i yuwaan Asula ica atsuma a ruhu du, ozo o ro ee reve shi. Ne e reve ili i na yaa dansa shi, cine ee reve cine aa usu, "Ami, wo o'wo ne?"† ¹⁷I to godyusho Asula o ure u sa'ani, amma ayi ndolo aa kamba za ro shi.

¹⁸N godyoo ta Asula a na n la'a ndu suru mayan ma adanshi ne elentsu o ro. ¹⁹Amma na tsu boloto ubata u ta tsara tsu yuwaan Asula aganda, n ta dansa u ta la'aa mu ulobonu n damma idanshi i ton i na ama ee reve ana maa damma idanshi ukpakukupa kupa (10,000) ne elentsu o ro.

²⁰Aza a va, lyawai a yuwusan majiyan cine muwun n tsu yuwan. Yoo o'wo gashi muwun n na koto n yuwain iwuya shi. A majiyan ma du i yuwan majiyan tsa aza a na o gbozoi de. ²¹A dana ta atsuma a Adanshi a Asula:

"Asulazuva a damma ta,
'N ta yuwaan ama a va adanshi

ne elentsu a na omocin aa gura damma.

Amma na ne suru aa zuwaa mu atsuvu shi.' "

²²Une'e wa adanshi ne elentsu o ro iroci i da adama a aza a na a ri ele aza e Itoni a da shi, amma adama a aza e Itoni a da shi. Une'e wa alajiya e ikaka ya Asula iroci i da a tyo ubata wa aza e Itoni, amma adama u kamba aza a na a ri ele aza e Itoni a da shi. ²³Ko na ne, na za na ri za vi Itoni shi ko ama a na e revei ili i ndolo shi, a tawa ubata wi ibolo i du avu a uwwa du a yuwusan adanshi ne elentsu

o ro, a ta jiyān gashi i jaara tā. ²⁴ Amma na ama o ndolo a uwwa a na za suru ta yuwusan alajiya e ikaka ya Asulā, e te reve a na ele aza o unusu da, waru ili i na a uwwai u te ge'eto le. ²⁵ A ta damma ili i na i ri pe usokowu atsuma o okolo e le. A ta kingyo avu a yuwan aganda avu a damma Asulā, “Amayun a da vu ri na ama a nda.”

Isa'ani atsuma a aganda

²⁶ N'utsa n va, ni i boloto tsara i yuwan aganda, ni i ciga i 'yuwan i yuwan ili i sa'ani i na yaa kamba ama a na a ri lo suru. Ne da wu ntsayi u dana na vuma ro cana ishipa ko u yuwan uritosu ko u damma ili i na Asulā a dammai ko u yuwan elentsu o ro ko u cuɗuwa ili i na vuma'a u dammai. ²⁷ Ni i boloto ubata u ta, i ta gura lyawa vuma ro yuwan adanshi ne elentsu o ro, ko ama e re, amma she u la'a ama a ta'atsu wan. A yuwan adanshi aza a ta ta, reve vuma ro cuɗuwa ili i na a dammai. ²⁸ Na babu za na aa cuɗuwa ili i na a dammai, ayi za na yuwain adanshi ne elentsu o ro nu u 'yuwan u ciga u rungwa, avu u yuwan adanshi na aciyayi na Asulā goon.

²⁹ Ama e re ko ama a ta'atsu a yuwan adanshi e ikaka ya Asulā, avu ama a na a buwai a kalyuwa ili i na a dammai ulobonu. ³⁰ Na vuma ro aa yuwusan alajiya e ikaka ya Asulā, avu Asulā o roco za ro ili i ro, za na a yuwusan alajiya e ikaka'a wi isawan avu u lyawa vuma ndede lyuwa elime na adanshi. ³¹ A mantsa ma ta i lyawa vuma ta yuwan adanshi, avu suru ndu i rito ili i ro, reve waru i dashi tsura ugbamu wa asuvu. ³² Ama a na a yuwusan alajiya e ikaka ya Asulā a ta gura guza

aciyele, reve a lyawa ozo o ro a yuwan adanshi. ³³ Asulazuva Asula o ujambu a da shi, amma a asuvu nden da, cine u ri a a'isa a aza e Itoni suru.

Na ama a Asula o boloto adama a yuwan aganda, ³⁴ lyawa amaci a dana kpaku. She i lyawa le a yuwan adanshi wan, adama a na Wila u damma ta amaci a yuwan tsutoni. ³⁵ Na a ciga e reve ili i ro, e ece ali e le na a kamba a 'wa le. Ili i wono i da ka yuwan adanshi atsuma e ibolo.

³⁶ Adanshi a Asula o uta ya'a du shi, waru ya'a du da u rawai goon shi. ³⁷ Na vaa yuwusan majiyan gashi avu vuma na a yuwusan alajiya e ikaka ya Asula a da, ko gba vu ta nu une'e u ruhu, vu te reve a na maa danasa ili i na Zagbain damma numu n dana da goon. ³⁸ Adama o ndolo ama a na a 'yuwain a zuwa atsuvo e ili i na n danai she i zuwaa le atsuvo wan.

³⁹ Ama a va, icigi yo okolo i du ayi da i ciga i damma ikaka ya Asula, amma she i putsa vuma na aa yuwusan adanshi ne elentsu o ro wan. ⁴⁰ Atsuma e ili i na yaa yuwan suru wo o'wo o ure u na wu ntsayi waru u tu ufofu ulobonu.

15

U'yosun wu Zamawawa

¹ Ama a va, gogo n ciga ta n cuwaan du na Alabari a Sa'ani a na n yuwaan du de alajiya. I ushi yi ta de, avu waru yi isawan de nu ucawu wo okolo a du. ² Ayi Alabari a Sa'ani a nda ayi da waa wawa du ni i bana yi ugbamu atsuma e ili i na n damma ndu. Ni i yuwan ne shi, ucawu wo okolo a du wo o'wo ta pere.

³ N damma ɗu ta ili i na a damma numu. Ayi ili i nda ayi da u la'ai ulobonu suru: Zamawawa kuwa ta adama o unusu u tsu, ne da Adanshi a Asula a dammai. ⁴ A cido yi ta, o urana wa ta'atsu avu a 'yasan yi wuma, cine Adanshi a Asula a dammai. ⁵ U roco ta aciyayi ya Bituru, waru u roco ta aciyayi a tyo a akapi Kupanejere'e. ⁶ Ana ayi ndolo kotoi, u roco ta aciyayi a tyo o otoni a yi a na a la'ai ukpakuton (500) a mantsa ma ta. Aza a na e ene niyi na abunda a buwa ta wuma, ozo o ro gba shi a kuwa ta de. ⁷ Avu waru u roco aciyayi a tyo ya Yakubu, waru avu u roco aciyayi a tyo ubata wa ajiya suru. ⁸ O ukosu suru, u roco ta aciyayi a tyo ya'a va, gashi za na a matsain a mantsa ma na koto wu ntsayi a matsan mu shi.

⁹ Ajiya suru a la'a mu ta. N rawa e de mu aajiya shi, adama a na m bongi ta aa'isa a aza e Itoni a Asula. ¹⁰ Amma isa'ani ya Asula i kambato mu ta ili i na n ri, waru isa'ani ya yi e ekere a va pere da shi. N dakanu ta adama n la'a akapi a ajiya ulinga suru, waru amayun a da, ni isa'ani ya Asula i da n yuwain ulinga'a, nu ucira u va u da shi. ¹¹ Na amu n yuwaan du alajiya ko ajiya† a yuwaan du alajiya, ili i ta i da tsaa yuwusan, waru ili'i i da da i usuyi.

A damma aa 'yasan akwakwa shi

¹² Na tsu yuwan alajiya a na a 'yasan ta Zamawawa diga o ukwa, to cine ozo o ro a du aa damma aa 'yasan akwakwa a kamba wuma shi? ¹³ Na ayi ndolo amayun a da, u to rocosu a 'yasan Zamawawa shi. ¹⁴ Na a 'yasan Zamawawa shi, to, alajiya a tsu pere da, waru ucawu wo okolo a du pere da. ¹⁵ Na aa 'yasan akwakwa shi, tsu yuwan

tā epen a tyo e ekere a Asulā ana tsu dammai a 'yaṣan tā Zamawawa, agba amayun a ḏa shi. ¹⁶ Nā aa 'yaṣan akwākwa shi, koto fo a 'yaṣan Zamawawa shi. ¹⁷ Nā koto a 'yaṣan Zamawawa shi, ucawu wo okolo a ḏu pere ḏa, waru e te ge'eto ḏu adama a nusu ḏu. ¹⁸ Nā ayi ndolo amayun a ḏa, ele ama a na a kuwai ḏe cina a ca okolo e le ubatā wā yi a puwan tā ana. ¹⁹ Nā tsu zuwa okolo Zamawawa ta wawa tsu a wuma u nda goon amma a wuma u na waa tawa shi, to, iliyali i tsu i la'a tā akapi a ama.

Ili ya amayun cine aa 'yaṣan akwākwa

²⁰ Amayu'un ayi ḏa a 'yaṣan tā Zamawawa atsuma o ukwa, ayi ḏa umatsun wu ufaru atsuma a aza aa 'yaṣan a akwākwa. ²¹⁻²² Ama suru a kuwa tā adama e ili i na vuma tā yuwain, Adamuḥ ḏa tawa ntsu nu ukwa suru. Ne ḏa fo aa 'yaṣan ama atsuma a akwākwa adama e ili i na vuma ro yuwain. Zamawawa ḏa aa tawa tsu nā wuma suru. ²³ A tā 'yaṣan vuma suru o ure u na wu ntsayi. Zamawawa ḏa a fara 'yaṣain. Nā Zamawawa kamba, a tā 'yaṣan ama a yi suru. ²⁴ Nā ayi ndolo koto, ukosu wu uvadi u nda u tā tawa. Zamawawa to kototo n'yuwatan mā yi suru suru, avu u ca tsugono'o e ekere a Asulā Dada. ²⁵ Na a ciga a 'yuwan Zamawawa yuwan tsugono she nu u lyuwa aci a n'yuwatan suru avu u zuwa le zaḷa va apata a ana a yi. ²⁶ Ma'yuwatan mo ukosu ma na woo kototo ayi ḏa ukwa. ²⁷ Ana Adanshi a Asulā a dammai a na u ta zuwa ili suru zaḷa vu ucira va yi, o bolo pe Asulā shi. Asulā a ḏa a zuwai ili suru zaḷa vu ucira wu Zamawawa. ²⁸ Avu, nu u lyuwa

aci e ili suru, Mawu'un u ta zuwa aciyayi zala va Asula, za na zuwai ili'i suru zala va yi. Avu Asula a yuwan tsugono tsi ili suru.

²⁹ Cine tsa da gba adama a ama a na a rumbuyi adama a aza a na a ri ukwa? Cine tsa da ulobonu wa yi? Na a 'yasan akwakwa shi ko ke'en, cine tsa da aa rumbu ama adama e le?

³⁰ Adama a nye tsu zuwai aciyatsu atsuma e meleshe rumu suru? ³¹ Aza a va, usana suru n ta gashi n ta kuwa. Amayun a da maa dansaa du. Cine i revei maa lapusa makakan na adu na amayun adama e ili i na Zagbain Yesu Zamawawa yuwaan ndu, ne da maa dansa ili i nda'a. ³² Na a 'yasan akwakwa shi, nye i da maa tsura na n yuwan nlangi na ama a Afisu aza a na a ri nlyayi? Na a 'yasan akwakwa shi nye i zuwai tsa yuwan cine a dansa shi?

“Lyawa tsu lyuwai tsu sowoi, adama a na nfa'an tsu ta gura kuwai.”

³³ She i lyawa nanza luluma du wan. A ta dansa, “N'utsa n wuya n ta lungusa nden n sa'ani n du.”

³⁴ I kambato majiyan ma du e ili i sa'ani avu i lyawa mayan mo unusu. Yu uwwa wono a na ozo o ro a du koto e revei Asula shi.

Lipu tsu na Asula a 'yasan tsu

³⁵ Za ro te ece, “Cine aa 'yasan akwakwa a kambu wuma? Cu'un lipu ne da aa dana na ayi?”

³⁶ Yeci i tsulo tsa da ndolo'o. Na vu cu'wan cu'un e ida, u tsu kungwa shi, she nu u kuwa ne'en.

³⁷ Icu'un i na vu cu'wain i tsu rotso ca'an na utai shi, nu u kungwa. Cu'un vu shina da goon na ri u'yewu ko ili i na vu cu'wain, agba ili i na vu cu'wain avu'un a da shi. ³⁸ Asula a da a tsu zuwa

cu'un ndolo kungwa cine u cigai, cu'un suru u tsu kungwa ta na cu'un va avu'un va yi. ³⁹ Lipu na ri na wuma suru a ta icu'un icu'un. Vadilima gba a ta na cu'un lipu ta. Inama waru a ta na lipu koko'o. Nnunu na mugula a ri ili i ta shi. ⁴⁰ Cu'un lipu ta, ta de zuva,† waru cu'un lipu ta, ta pa atsuma o uvadi. Ulobonu u lipu u na u ri de zuva u tawa ta ko'o na cu'un vu ulobonu u lipu na ri pa atsuma o uvadi. ⁴¹ Urana u ta nu ulobonu wa yi, woto u ta nu ulobonu u ro. Italyo'o waru a ta nu ulobonu u ro koko'o.

⁴² Ne da waa dana na a kambato akwakwa wuma. Lipu tsu na tsu kuwa reve u shama, a ta dana ko'o na a 'yasan le, adama a na a mantsa mo ndolo aa kuwa waru shi ko ke'en. ⁴³ Na a cido lipu tsu, a ri ulobonu shi waru a ri nu ucira shi. Na a 'yasan le, a ta dana ulobonu nu ucira. ⁴⁴ Gogo tsu te eneshe lipu va ndana, amma na a 'yasan le, o to o'wo lipu na Ruhu va Akiza aa ca wuma.

Amayun lipu va ndana da, waru amayun a da lipu ro ta lo na Ruhu va Akiza aa casu wuma. ⁴⁵ Adanshi a Asula a damma ta, "Vuma vu ufaru Adamu ushi ta wuma." Ayi vuma vu ukosu, za na ayi da Zamawawa, wo o'wo ta ruhu na tsu ca wuma. ⁴⁶ Ili i na i fara tawai ayi da lipu va ndana, avu lipu ruhu tawa na acapa. ⁴⁷ Asula e kene ta mabula avu u yuwan Adamu vuma vu ufaru. Vuma ve ire gba zuva da wu utai. ⁴⁸ Vadilima suru ta na lipu cu'un va Adamu. Waru za na ri zuva suru u ta na lipu cu'un vuma na cipai diga zuva. ⁴⁹ Cine tsu ri gogo tsa Adamu, vuma na a yuwain na mabula, ne da urana u ro tsu to o'woi tsu Zamawawa, vuma va zuva.

⁵⁰ Aza a va, n ciga du ta i reve lipu tsu va ndana na mpaşa ta shama. Ayi nda u ta dansaa tsu aa tsura tsugono tsa Asula shi, za na aa dana babu ukotu. ⁵¹⁻⁵² Gogo n ta damma du ili yu usokowu i na Asula o roco numu: Ozo o ro a tsu aa kuwa shi, amma ne e ivula aavana o ukosu, Asula a ta vadala tsu babu usan, cine vu revei igipatsu ye esu i ri gogogo. Ne e ivula aavana, a ta 'yasan akwakwa, waru aa dashi kuwa shi, avu suru ntsu tsu ushi lipu sa'avu. ⁵³ Adama a na lipu tsu na aa kuwa avu u shama, a ciga a 'yuwan a vadala le a kambā lipu va zuva na aa kuwa shi suru suru. ⁵⁴ Ni ili i ndolo i fara, avu lipu va ndana na aa kuwa a vadala le a tyo a lipu va zuva aza a na aa kuwa shi, avu Adanshi a Asula a shiwan:

“O kototo ta ukwa, a lyuwa ta aci a yi suru suru!

⁵⁵ Te da ubata u na ukwa u lyuwai aci?

Te da waru ucira wu liya vu ukwa na tsu tada na mballa?”

⁵⁶ Unusu u da u tsu tawaa na mballa n na ukwa u tsu tawaa. Wila waru ayi da u zuwai unusu u tsurai ucira'a. ⁵⁷ Amma tsu godyo ta Asula ana u lyawai Zagbain Yesu Zamawawa tsu u ca ntsu ulyuwu wa aci!

⁵⁸ Ama a va, aza a na n cigai, adama a na Asula a yuwain ne, yi isawan nu ucira. She i lyawa ili i ro i jingada du tsara i lyawa ure wan. I zuwa aciyadu i yuwan ulinga babu uro na yaa yuwan ulinga wu Zagbain, adama a na i reve ta ulinga u na i yuwain adama a Zagbain suru woo o'wo pere shi.

16

Ubolotsu wi ikebe adama a ama a Asula

¹ Ni i ushi ikebe adama a ama a Asula, n ciga du ta i yuwan cine n dammai aa'isa a aza e Itoni a na a ri pe atsuma a Galatiya a yuwan. ² Urana wa Aladi suru i 'yuwan i ciga za suru u zuwa ikebe i ro e ili i na u tsurai. I zuwa le adama a sadaka. Ni i yuwan ne, yaa tawa nda i 'yawa ndede tsara i ushi utafa a mantsa ma na n tawai shi. ³ I dangwa aza e Itoni o ro a tara ikebe'e a 'yawa Urishelima. Na n rawa n ta ca le mepepeline ma na woo roco adu da i dangwa nle. ⁴ Na wu ntsaa amu fo n 'yawa, tsu ta yuwan mmalu suru.

Ili i na Bulu cigai u yuwan

⁵ Na n kanda ruwa Makidoniya suru, n ta tawa n kalyuwa du. ⁶ U ta yuwan n danu na adu ne'en rana re, ko a tyo o ukosu u mantsa mo utanu. Avu i kamba mu atsuma a mmalu n va, ubata u na mee tyo suru. ⁷ Na Zagbain usu, n ciga n rawa de go'o shi, tsara n danu obolo na adu a mantsa na abunda a na maa tawa avu n karashi. ⁸ Amma n ta dana pa atsuma a Afisu hali urana u na aa yuwan Abuki o Urana wa Kupoton† u kara. ⁹ Adama a na a kpatu'waa mu ta ure u sa'ani u ro adama o ulinga u gbain, waru ama na abunda a ta ususu, ko na wo o'woi n'yuwatan n ta lo na abunda.

¹⁰ Na Timoti rawa, i ushi yi ne ekere e re. U ta yuwusan ulinga wu Zagbain, cine amu maa yuwusan. ¹¹ She i lyawa nanza rono yi e ida wan. I zuwaa yi aba'un reve i kamba yi a mantsa ma na waa kamba ya'a va. N ta pura yi na ama a na aa tawa.

¹² Adama a za tsu Apolo, m patishi yi ta u 'yawa obolo na aza a yi a mantsa ma na aa kalyuwa du,

amma u ri na aḁa a na waa 'yawa gogo shi. Nu u tsura mantsa u ta tawa.

Ukosu u mepepeline ma Bulu

¹³ I dana ufobu. I bana ucawu wo okolo a du ulobonu. Waru she yu uwwa wovon wan. Yi isawan nu ucira. ¹⁴ I yuwan ulinga u du suru atsuma e icigi.

¹⁵ I reve ta a na Istifana nu u'wa wa yi mabula ele da aza a na a fara o o'woi aza e Itoni atsuma a Akataya, waru a ca ta aciyele adama a aganda a ama a Asula. M pati du ta ama a va, ¹⁶ i toni ama a nda na akapi e le aza a na a yuwusan ulinga obolo ne ele. ¹⁷ N yuwan ta mazanga a na Istifana, na Fatunatu na Akayiku a rawai. A kamba mu ta adama a na i ri pa shi. ¹⁸ A ca mu ta ugbamu wa asuvu, waru n reve ta a yuwaan du ta fo ne. Ni i ciga i 'yuwan i ca tsugbain a tyo aza a na suru a yuwain tsugbashi tsa na tsa ntsayi.

¹⁹ Aa'isa a aza e Itoni pa nda atsuma e ida ya Asiya a ta lyungusaa du icasu i le. Akila obolo na Birisika, obolo na aa'isa a na o bolotosu o u'wa u le, a ta lyungusaa du icasu i le atsuma a ala a Zagbain.

²⁰ Aza e Itoni yi Zagbain suru a ta lyungusaa du icasu i le. I casalai ulobonu.

²¹ Amu Bulu, amu da n danai icasu i nda ne ekere a va.

²² N ta yuwusan avasa Asula a yuwaan vuma na 'yuwain Zagbain un. Lyawa Zagbain tawa gogo.

²³ Lyawa isa'ani ya Yesu Zagbain dana obolo na adu.

²⁴ N ciga ta vuma na suru ri atsuma e Yesu Kristi Zamawawa.

**Nzuwulai n Sa'avu na Tsishingini na adiva a
na a dangulai a Nzuwulai mu Ufaru
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tsishingini

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files
dated 29 Jan 2022

bb185c63-dc44-572c-ae93-66252c4dfa1e